

# **IZESU' EVENELE ZUHO LOMA EBEKU' MINANI' ENGI' LUHUVO NITE' PAULO' GIZE-NGIMINE'**

Izesu' Evenele Loma Ebeku' Minani' Neti  
Luhuvo Nite' Paulo' Gize-ngidingumu' Gomu'  
Gataa' Gamazi

Mene luhuvo nite' nene aposolo' Paulo' gizine'.  
Eikumu' nene mono' godolo gosohoku' Aposolo'  
buku neu' nene muki' goloso gatelesane. Izele-  
hoi melehoi ne Zuda aleve minasine'za Zuda  
alevelite misubo'ningu' minamasine'. Siti naba'  
naba Taliso ve langu' Kilikia polovinisi ve lani'  
neu' nene minani'. Gamene ma nene Paulo'  
meleho aza Loma ve lolo' ine'. Loma ngamani  
ne'mo nene leli' misuboteuti' ve ne neive lo  
line'. Nemu' Paulo' soto' ine' gameneu' nene  
Loma ve ve li-daa' ido' Zuda ve ve li-daa' ani'.  
Paulo' gulive Zuda velati' nene Saulo' ve lo  
minine' ido' Loma velati' nene Paulo' ve lo  
minine'. A'mine gulive Paulo' ne'mi monovo  
nene ngomo ve losa ve. Paulo' aza umun-  
givelo' minine' gameneu' nene Talisola mino  
seli numuno gizaato' lainimi ine'. Mine do vo  
naba ine' nene Zelusalemila vo Zuda tisa' naba  
gulive Gamaliele' ve lo minine' ne'mo sukulu  
lo-ngemaa' ine' sukuluu' vo sukulu lo minine'.  
Halisaio' ve gehepeve lolo' ogo Zuda velite lou'  
gamazilo' e'metelesa amuzo goloso molaa' ine'.  
Alinge' Izesu' evenele zuholite Izesu'nimu' nene  
O'moso'mi gipele mino aza do lu' izelive lo  
O'moso'mo imiselelesa live ma ne neive lani' gelo

a'mine nene gosoho' nilave lo gelo nemu' a'mido' gili ele'vole' igi ido' evene' li-ngimamilizave lo o've lo-ngedelesa amuzo molani'. Ne'mine ogo api' ogo mono Izesu' evenele vise' ogo do vo nala' numungu' hulo-ngedelesa vine!. Ebe' hota ato' aleveliti misuboukosi ne'mine o-ngedelesa vine'. Ne'mine ogo nomonivo Izesu' Kilisito' aza holi'mi labana've nesi ivile' ivo atoli'mine labana'vesi mino soto' o emavo neloti' lulo do velepe' izo Izesu' evenele lolo' ine'. Zuda ve minamine' heta ato' ve nene mono' gamazi lamine' nene lo-ngemelive lo O'moso'mo eletine'. Ebe' ato' ato' mukita ne'mine olosa vine'. Zuda vesi ido' evene' lingi ma netesi o've li-dilisa amuzo milani'. Gamene ma nene bilaa' ani'. Gamene ma nene nala' numungu' ele'mize milaa' ani'. Bili hiladine'za O'moso'mo gizebo lamine' o'de'mo vo minivo gono've do osu' line'. Paulo' aza nadi' ogo hilihe ne'mi monovo nene ma mono' godolou' gizamani'za gomutati' vomine evene' nete ti' li laa' nave. Izesu'nimu' evene' lo-ngimingumu' Loma ve nete gonito' ele'mize mili luvono nene bainati mitetunu' gitu hulani' ve laa' nave.

Mene luhuvo nite' nene Loma ebeku' Izesu' evenele minani' nene Paulo' gize-ngidine'. Loma neve nene kanitili Italia ve laa' nangu' nene siti naba minine' ve. Vanu milioni (1 000 000) nesi ivile' ivosa evene' vai' goloso minani' ve. Loma aleve nene amuzo malehe aleve goloso minani' ve. Engi' ami'ine nete kanitili muki' nene ngivile' ani' nenako nemu' ve naba'ine Kaesale' aza Zuda velite ebe'inesi ne gizebo ogo ebe' mukito' gizebo ine'. Paulo' mono' gamazi lo-ngemelesa monine' ebe' muki' nene Lomali'mo gizebo o minine'.

Loma ebeku' nene mono' nado api' ogo soto' ihe nemu' nene ma gelamune. Ebe' atota mono' aleve lili' ani' muki' nete a'mida igi mini mono' zuho di soto' ani' noloseive. Paulo' aza a'mine mono' nene Loma vetingu' ma do soto' amine'za ei' vo Izesu'nimu' lo-ngimine' ebe' linge mauti' a'mida vani' nene gele neive. Gulive'ine nene mene luhuvo gizo osu' lo mese' aseka lo-ngidida nene gatelesane.

Paulo' aza Kolidi ebeku' minine' gamene nene Izesu' evenele zuholite goho' gahalikumu' moni di nubo ani' nene do Zelusalemila volosa do nene ogo minine' gamenela mene luhuvo nite' nene gizine' ve. A'mine moni do vo ngemosa neloti' Loma vetingu' Izesu' evenele zuho minanikisi gamene ngomosi' ma minosa neloti' nene kanitili gosoho' gulive Sipeni ve languko nene vo Izesu'nimu' mono' gamazi lamine' nene lo-ngaemelesuve lo Loma vetingu' Izesu' evenele zuho minani' nene luhuvo nite' gize-ngidine'.

Mene luhuvo niteku' Paulo' aza mono' gamazi li-ngaingangutu' gilivo naba o minine' nene Loma vetingu' mono' aleve minani' nene gize-ngidine'. O'moso'mi velelo' lisihel' i minikevo O'moso'mo do ngu' izeline' aka hamo' nene Izesu'nido' gili ele'vole' ikevosavo' ve lo monoli'mo lo neive lo lo-ngaime'. Evene' muki' nene lihime monovo dikeve. Zuda aleve O'moso'mi lou' di minave netesi ido' lou' gamazi damave heta ato' ve netesi dikeve. Ne'mine o neine' nenako nemu' evene' muki' ingine O'moso'mi velelo' ve lisiheto' ve lili' ilizado' o neive. Gamene gamene O'moso'mi lou' gamazi mukito' e'metato' nene evene' hamoli'mosi ngelo ne'mine amiline' ne-

nako lou' ne'mo ngelo O'moso'mi velelo' do lisiheto' ve lolol' o-ledamoloseive. Zuda vesi ido' heta ato' vesi O'moso'mi velelo' lisihe' o minaa' aka hamo' nene Izesu'nido' gele ele'vole' oga' ne neive. Ido' Izesu'nimu' gele ele'vole' une' ne'mi gihile've nene O'moso'mo lemeni dameni gosoho' leme neido' do molo ogo molo minelonido' o neine' monovomu' nesi longimine'. Ido' Izesu' malipo zalo' helosa lihimete do hulani' nenako O'moso aza lelikumu' gohi goloso gele minelido' nomive. Ne'mine o neine' nenako O'mososi lezesi olusoteu' nene hongu ido' zogo monovosi nene neive lo line'. O'moso'mi Sikalahu' ne'mo O'moso'mi izipahala zuho nizave lo do kegese-ledo lihime dikilizave lo hize ele' o-ledaa' neive. Ne'mine oga' neine' nenako helaa' ne'mosi ngelo do'mo leme-ledamoloseive. Mose' lou' gamazi ne'mo nani'mine gono daa' neihe nemu' lo ngolo' line'. Zuda aleve muki' ado' O'moso'mo ei' izipahala zuho gehepeve ve lo do kegesekine' nete Izesu'ni nanitekumu' ningi hulahe nemukisi line'. O'moso'mo gelavo ne'mino soto' ine' ve. Nanitekumu'. A'mine ne'mine ine' ne'mo heta ato' ve netesi Izesu'nido' gili ele'vole' ilizadi'mo O'moso'mi izipahala zuho lili' ilizani' aka do ngolo' line' ve lo line'. Gamene ma Zuda ve ingine Izesu'ni ningi gosele' iga' ani' monovo'ine nene huli Izesu'nimu' gili ele'vole' ilisave. Ido' ne'mine ilizadot' gihile've lamine' nene evene' mukita soto' o-ngedelesive line'. Ne'mine losa Izesu' evenele zuho ingine nani'mine monovolo' izi mili minilizahem nemu' line'. Leze hamo hamo' nene O'moso'mo dalizave lo molo-lede

neine' gono nene dalone. Gosele' amo gono nene amuzo molo dalone. Ge luka neme ne lu'ne geme ido' ge hize ele' o-nede ne hize ele' o-gede lolone. Inite' di goloso i-lidaa' nave nesi nene lute ngemo monovo goloso do velepe' izo o ngemamo monovo lamine' o ngemelone. Dinate nene bekimi ogo takisi meni hizelone. nGamanis nesi ido' ngamani gono daa' nave naba netesi gamazi'ine gele dalone. Monovo goloso ato' atoto' nene mine olovo' o minelone. Izesu' evenele zuho linge malite inite' ma ado' ize nene nalobe namalobe ido' gamene naba ve lo gizebo lamine' olube amalobe li gili nevo'mine initekumu' lezesi lu'ine mili hamo' amaa' nave nene lovo o ngemamo asi hamo' zuho none lo bizo minelone line!. Inite' olonidi'mo Izesu' evenele linge ma lu'ningu' do goloso ogalive lo monovotelo' gizebo lamine' ogo ido' inite' goloso neive lo ninga gele minelive ma a'mine inite' goloso nene daline' inite' ogalone lo gizebo lamine' ogo monelone line!. Ne'mine lo luhuwo gize osu' loo evene' muki' nene mese' aseka longedo O'moso gulive do hozi loo gize osu' line!.

*Paulo' Aza Izesu' Evenele Loma Ebeku' Minani'  
Nene nGopo'ni Lo Luhuwo Nite' Gize nGimine'  
Monovo*

<sup>1-7</sup> Paulo' neni' nene Izesu' Kilisito' aposolo mineline lo O'moso'mo nele'mize molo ei' gamazi've lamine' nene lo soto soto' ogo mineline lo do kegese-nedavo Izesu' Kilisito' gono've daa' uve lolo' ogo minuve naza O'moso'mi lulo lengemo ei' evenele lolo' igi minilizave lo lengele'mize molave Loma ebeku' minave lengi'

nene luhovo nite' mene nogize-lingiduve. A'mine O'moso'mi gamazi lamine' nene O'moso'mo longemavo eze veleuti' gamazi li soto' iga' ave nete gomukuti' mono' godolou' gizikavo minine' ve. A'mine gamazi lamine' nene ei' O'moso'mi gipele Guvetesi ve Izesu' Kilisito'nimu' gizani' ma neive. A'mine O'moso'mi gipele aza evene' okode ne'minesi soto' ine' nene Zuda veti guvetesi ve naba gomu' minive Davidi' a'vopilemo' zuhouti' soto' ogo minine' ve. Ido' ei' Sikalahu've nene atoli'mine ogo lisihe' lamine' minidi'mo O'moso'mo amuzo molo hilinguti' do ote-dine' ne'mo ei' gipele gehepeve minine' nene lelebizave. Ido' ei' Izesu' Kilisito' nene O'mosolo' medelo mino aza nasahili' o-nedo aposolo nele'mize molani' nene naza eze gulive nene do ote-do evene' zuho ato ato' muki' mini'mi monani' nene ezemu' lo-ngemekuvo ezemu' gili ele'vole' igi gamazi've gili di e'metilizave losa nele'mize molani' ve. Ido' Loma ebeku' O'moso'mo Izesu' Kilisitoda lengele'mize molave linginesi nene a'mine O'moso'mo evene' zuho ato ato' mukita viline lo lo-nimine' aleveti muliseuti' nene nizave. Nemu' nene luhovo nite' mene nogize-lengedo O'moso metehosi ido' Guvetesi ve Izesu' Kilisito' nesi nasahili' i-lingidikesivo ne'mo lengi' muludingu' hongu lo minivo mine lamine' igi minilizave lo O'mosola noluve.

*Paulo' Loma Ebeku' Izesu' Zuho Minani' Nene Vo Mono' Gamazi Lo-ngemelesa Lulo Otingumu' Gazine' Gamazi*

<sup>8</sup> Gamazi lo ha'na ogo loloze. Gana' nene api' ogo ti' lo noluve: Lingine Izesu' Kil-

isito' gamazi've amuzo mili gili ele'vole' igi minani' monovotine nene misubou' misubou' buu lo nomonive likevo naza gelo Izesu' Kilisito' velemu' ogo lengi' mukikumu' tangezo' ve lo O'mosola noluve.

<sup>9</sup> Ido' ne'mine noluvoni' nene naza ei' gipele'mi gamazi've lo soto' o ngeme'mo mono eze gono nodo lu'ne molo opo'ni laa' nouvoni' O'moso ne'mo ezela luvongu' lengikumu' gamene gamene laa' nouvoni' monovo'ne nene gele neive. Naza nene mo lamineto' noluve.

<sup>10</sup> Ido' naza gamene gamene a'mine O'mosola luvo gamenelo' nene ei' gilivo lisihe' o no-line' nene naza gomu' lengita alove lo gamene ha'na gele'mo ogo minuvoni'za aka ma soto' onidamivo amuvoni' mamu' nene idise aka ma vele-nidavo lengita alohe lo laa' nouve.

<sup>11</sup> Ido' ne'mine lo O'mosola laa' nouvoni' nene naza lengita vo O'moso'mi Sikalahutati' daa' noune' amuzo ma nene lehize-lengedekuvo monoku' amuzo mili oti minilizave lo lengita volove lo amuzo molo gelaa' uvoni' nemako nemu' nene laa' nouve.

<sup>12</sup> Ido' lengi' do amuzo molo-lengedelove noluvoni' nene naza ti' lo gelosa noluve. Naza lengi' nizada vokuvo lingine Kilisito'nimu' gili ele'vole' iga' nani' nemukisi ido' naza gele ele'vole' oga' nouvoni' monovo'ne nemukisi nene lo volelo' melo' ogo gelo lute do amuzo molalone lo gelosa noluve.

<sup>13</sup> Ido' neze zuhokizo, naza lengita volove lo gamene vai' ga'ne gelo minuvoni' nemu' lingine gilamilizani' nene edamoloseive lo gelosa nolo-lingimuve. A'mine gomu' lengita vamuvoni'

nene voloni' aka'ne ma ngolo' lamivo vamu-voni'za idise aka'ne ngolo' lavo volosa gelekuve. Aka'ne ngolo' lavo volosa giluvoni' nene evene' ling'e zuho ato atota vo gono dokuvo gihile izine' ne'mino lengita a'mine'mine ogo vo gono dokuvo gihile izavo mono' lengemeni damenisi minilizave lo volosa giluvoni' ve.

<sup>14</sup> O'moso'mo mono' gono nene evene' ato ato' mukita daline lo nimine' nenako nemu' nene nGiliki aleveti monovo'nido' nge'metaa' ave nevo'mine madu'ningu' gamazi lamine' minaa' ine' alevelasi ido' nGiliki aleveti monovo'nido' nge'metamave nevo'mine madu'ningu' gamazi lamine' minesa'mine' alevelasi mukita nene mono' gono daloni' o neive.

<sup>15</sup> Nemul' nene Loma ve lingenelasi Izesu' gamazi've lamine' nene lo soto' ogo lo-lengemelesa gilingili ogo nouve.

### *Izesu' Kilisito'nimu' Gamazi Lamine' Nene Amuzo'vesi Neive Lo Paulo' Line' Gamazi*

<sup>16</sup> Naza Loma ebetasi vo Izesu' gamazi lamine' lo-lengemelove luvoni' nene a'mine gamazi ne'mo O'moso'mo Izesu'nimu' gili ele'vole' ave do ngu' izeline' amuzo've nene do soto' oga' neivosa nemu' nene naza a'mine gamazi lamine' nene lo soto' olosa novozo helamo nolize izo laa' nouvoni' nenako nemu' luve. Ee, a'mine gamazi lamine' ne'mo nene O'moso'mo do ngu' izeline' amuzo've nene gomu' Zuda vela do soto' o-ngedosa Zuda ve minamave nGiliki ve nevo'mida nesi nene do soto' o do novive.

<sup>17</sup> Ido' O'moso'mo evene' do ngu' izeline' amuzo've nene Izesu' gamazi ne'mo do soto'

oga' neive luvoni' nene nemu' luve: A'mine gamazi laminekuti' nene O'moso'mo evene' do lu' izelido' do lisihe' o-ledaa' neine' aka've nene soto' ogavo ninga gelekune. A'mine aka nene ne'mino neive: Evene' ma laza Izesu'nimu' gele ele'vole' ogo minelone' ne'movo' nene O'moso'mi velelo' evene' lisihe' lamine' lolo' ogo minelesune. Ee, gele ele'vole' olonidotikovo' nene O'moso'mo do lu' izelido' lisihe' ogo minelesune. Neve nene mono' godolou' ti' li gizi nizado' nene vo dave:

Inginge O'moso nenikumu' gili ele'vole' igi  
minilizadoti'  
evene' lisihe' lamine' lili' ilizave nene do ngu'  
izekuvo  
minivi' minivi' ilisave.

*Evene' Muki' Lelita Nene Lihimetesivo' None'  
Nenako Nemu' Nene O'moso'mo Lihime Lemo  
Lebeleleseive Lo Paulo' Line' Gamazi*

18-19 Evene' laza O'moso mehede emo goloso nite' muki' daa' nouningumu' nene O'moso izebolo' molavo lihimete lemelingumu' nene Okulumokuti' lo soto' ogavo a'mine monovo nene mo gelekune. Ido' gelekune' nenako nemu' nene Izesu'nimu' gele ele'vole' olonidotikovo' do lu' izeleseive luvoni' nene nemu' luvoni' ve. Evene' ingine goloso nite' di minaa' adi'mo O'mosomu' gamazi gihile lamine' neine' nene engi' lu'ningu' soto' ogo mineline' aka've hizi tilaa' nave. Ee, O'mosomu' ingine gililizani' o neine' gamazi gihile lamine' nene O'moso'mo inginela do soto' ogavo a'mine gamazi nene inginela soto' ogosa soto' neive. Soto' neine' nenako a'minemu' gilisa'mani' nene ingine a'mine gamazi gihile

lamine' lu'ningu' soto' ogo mineline' aka've nene angise'ine hizi tiladi'mo nene gilisa'mave.

**20** Ido' evenelite O'mosomu' gililizani' o neine' gamazi nene O'moso'mo inginela do soto' ine' ve luvoni' nene O'moso'mi monovo linge ma nene vetedunu' ningamolonido' o minine'za O'moso'mo Okulumo' misubo inite' muki' do soto' molavo mine do ogo neivo a'mine inite' muki' ningaa' nounidoti' nene eze monovo vete-dunu' ningamolonido' o minine' nene ha ning gelaa' nounako nemu' luvoni' ve. Ee, do soto' molani' inite' ningaa' nounidoti' nene aza minevo' minevo' ogo minaa' neine' amuzo'vesi ido' emeni dameni've atoli'mine ogo minine' laza ma ivile' amolonido' o minine' nesi nene ha ninge gelelonido' o neive. Ido' ha ninge gelelonido' neine' nenako O'moso huli minilizave ingine nene laza eze monovo danava ninge gelamosa hulune' ve li gamene nabala ma lamilisave.

**21** Ingine nene O'moso neive li ei' monovolo ha gili minani'za O'moso neive li eikumu' gilavo dizamivo opo'ni li di naba i-disa'mani' ve. Ne'mine ami ga'ine gilaa' ani' nene vo gopo'napa gehepeve ogo lu'ningu' gilaa' ani' nene gili lamine' ami liti'musou' nizani' gilivo minaa' ani' ve.

**22** Ne'mine igi mini ingine leli' nene gate gele nge lo nonive none li minani'za ingine ne'mini ma minami negi hizi mini

**23** emeni dameni lamine' atoli'minesi mino helamo minevo' minevo' ogo minaa' ive O'moso nene huli ezelo' medeli evene' minivi' minivi' ami hilaa' nani' neti avazaha nehe ido' nama

gaha ize guloti avazaha nehe gosiheliti avazaha nehe ne'mine nite' lolo' igi ngopo'ni laa' ani' ve.

**24** Ne'mine igi mini O'moso mehe'ine imikevo nemu' O'moso aza nene ele'ninge va'ninge ingalizani' monovo di gopo igi lu'ine do goloso iline' monovo goloso nene di mini engi' oko'ine di gopo ilisa evene' ingine lu'ningu' lanite' gilado' nene e'metamilizanako lu'ine'mo lanite' gilido' nene ha e'metilizave lo hulo-ngidine' ve.

**25** Ingine O'moso gihile nene huli-di ezelo' medeli soza o'moso di soto' igisa inite' muki' do soto' molave O'moso nene gubu' izi imi opo'ni lidami O'moso asi've lolo' ine' initeto' nene gubu' izi ngimi ngopo'ni li minaa' ani' ve. Ne'mine ani'za inite' mata' do soto' ive O'mosovo' nene laza gamene gamene opo'ni laa' olonido' o neive. Nemu' nene ne'mino minivo.

**26** Ido' evene' ne'mine igi O'moso huli-di soza o'moso ngopo'ni li minani' nemu' O'moso aza ninge mate ngimikivo ingine monovo goloso ado' ne'mine igi minani' ve: Vene' nete va'ningesivo' ingalizani' monovo O'moso'mo ganakuti' ngelebizine' ma nene huli O'moso'mo ngelebizamine' monovo goloso di soto' igi engi' vene' oko'ningu' inite' iga' ani' ve.

**27** Ido' a'mine'mine igi vemoho' ingine O'moso'mo venekisi ingaa' monovo ganakuti' ngelebizine' nene mehe'ine imi ve malite ve mamu' ma duvo lo oko'ningu' olo' lavo ngovozo nite' goloso di soto' igi angise'ine oko'ningu' inite' iga' ani' ve. Ne'mine adot'i lihime dani' votigilelo' do molo O'moso'mo lihime ngemavo oko'ine nene goloso oga' neive.

**28** Ee, ingine O'mosomu' gili minilizani' nemu' nene levelenga li huli-dikevo O'moso aza nene evene' ingine goloso monovomu' gohi gili minikevo a'mine ga'ine gilado' nene e'meti evenelite amilizani' o minine' monovo goloso ato ato' igi mili minilizave lo ninge mate-ngidine' ve.

**29** Ne'mino ninge mate-ngedavo evene' ingine lisihе' amine' monovo danava goloso vai' lihime daa' monovo nene engita vai' goloso soto' ivo minani' ve. A'mine monovo goloso nene ne'mini nizave: Mumuzo' iga', evenekumu' lukehe iga', evene' mala inite' lamine' ma soto' o ngemavo ma a'mine vemу' ngizebolo' gohi molaa', evene' ngibili hilaa', lolize hizaa', evene' go'ine izaa',

**30** evene' dovo ledevo' ogo ngemenga laa', O'moso'mi biluva've minaa', hokolize' igi hokolizeka li engi' oko'ine di dizaa', monovo goloso di soto' iga', ize'ninge me'ninge lani' gamazi gili hulaa',

**31** negi suno suno daa', gamazi angise li hukisa a'mido' e'metamaa', lu'ine ngimamaa', ido' evene' muhele'ine ningamaa' ave muki' ne'mine nene nizave.

**32** Ne'mino neivo O'moso'mo evene' ne'mine monovo goloso ilizadotii' nene golo hizi meni've helaa' nene dikevosa lisihе' oloseive line' nemu' nene mo gili minisasi a'mine luvoni' ne'mine monovo goloso nene ha igi mili minaa' nave. Idо' ne'mine iga' nani' nene goloso neine'za ingine a'mine monovo goloso a'nevo' nene ma amave. Ingiue ningavo evene' malitesi a'mine luvoni' monovo goloso nene igi mili nizavo ma nene ingine lamine' ve li siza li-ngidaa' nave. Ingiue

a'ne'mine iga' nani' ne'mo nene goloso gehepeve  
oga' neive.

## 2

*O'moso'mo Meni Golososi Laminekisi  
Evene' Monovotelo' Monovotelo' Ize' Molo-ledo  
Lemelingumu' Paulo' Line' Gamazi*

<sup>1</sup> Ido' a'mela luvoni' ne'mino ne'mine monovo goloso iga' nave muki' nene O'moso'mo lihime molo ngimika' neine' nenako nemu' evene' ma lingine evene' mamu' lihime dikeve li-ngidaa' nave muki' lingine a'mine lihime dikeve li-ngidaa' navete iga' nani' inite' goloso ne'mine nene linginesi iga' nani' nenako O'moso'mo evene' lihime ngemeline' gamenelo' nene lingine lengi' isetine izelive li-imilizani' gamazi ma minamoloseive.

<sup>2</sup> Ido' O'moso'mo evene' ne'mine iga' ave goni' o-ngedo lihime ngemeline' nene mo monovo lisihelamine' ogo lihime ngemeleseive losa gele none.

<sup>3</sup> Gele none'za lingine nene langisetinesi a'mine monovo goloso nene ha igi mili minaa' niigisa evene' ma a'mine monovo goloso iga' navemu' ize' mili-ngidi lihime dikeve li-ngidaa' nave lingine nene O'moso'mo evene' lihime ngemelinguti' nene ha olovo' olosune li gilaa' nahe. O'ove. Olovo' ngeli mo amilisave.

<sup>4</sup> Ido' ma nene ti' li gilaa' nahe: O'moso'mo isetine izo nasahili' o-lengede'mo ogo minaa' neine' ne'mo do akalo' o-lengedavo lutine di velepe' izi monovo goloso hulilizave losa nasahili' o-lengedaa' neingumu' nene lingine ha gililizanako

gili hulisa O'moso'mo atoli'mine ogo nasahili' olengedo geto lihime lengemo lengebelamo isetine ize'mo vo minaa' neine' nemu' nene lingine gilavo haza nite' lolo' ogah.

<sup>5</sup> Evene' ma lingine lutine di velepe' izami lutine di a'manapa i'mi vi minaa' nangumu' nene O'moso aza izebolo' moloka' moloka' o'mo vo minaa' neine' nene naba o'mo vo minaa' neive. Ido' O'moso'mo monovo lisihei' lamine' e'meto evene' ize' molo-ledo lihime lemeline' gamene soto' ogavo ma a'mine izebolo' molani' votigilelo' nene do molo lihime ngemeleseive.

<sup>6</sup> A'mine evene' ize' molo-ledeline' gamenelo' nene evene' ingine monovo goloso nehe lamine' nehe igi mili i nilizani' votigilelo' do molo meni ne'mino ngemeleseive:

<sup>7</sup> Ve ma ingine nene O'moso'mi monovo danava lamine' goloso neine' nene dalizangumukisi ido' ninge lamine' do-ngedo do naba o-ngedeline' nemukisi ido' helamaa' ngemeni dameni dalizangumukisi nene aka vise' ogo do soto' olone li geni initeli'mi lulou' minilizahe mulumo alumо initeli'mi lulou' minilizahe nemu' nene gilami gili huli geli igi monovo laminekovo' igi mili minilizani' nene O'moso'mo minevo' minevo' ngemeni dameni lehize-ngedeleseive.

<sup>8</sup> Ido' ve ma ingine O'moso biluva' i-di O'moso'mi gamazi gihile nene gili huli e'metami monovo golosolo' e'meti vi minave engikumu' nene O'moso'mo izebolo' molavo lihime atoli'mine ogo ngemeleseive.

<sup>9</sup> Ne'mine ogavo mulumo nite' goloso ato ato'

nene goloso nite'! daa' avela soto' o ngemeleseive. Gana' nene Zuda vela soto' o ngemosa neloti' nene Zuda ve minamani' ato' vela soto' o ngemeleseive.

**10-11** Ne'mine oloseine'za monovo lamineto' e'meti minaa' avela nene O'moso'mo do hozi lo do naba o-ngedo hongu lo minaa' monovo lehize-ngedeleseive. Ido' ne'mine o-ngedeline' nene O'moso aza evene' muki' nizanguti' nene linge mavo' do kegeso do lamine' o-ngedesa'mine' nenako nemu' nene Zuda ve gomu' ne'mine o-ngedosa neloti' nene Zuda ve minamani' ato' ve nesi nene ne'mine o-ngedeleseive.

**12** Ido' O'moso'mo gopo hazamu' evene' linge ma do lamine' o-ngedo linge ma do goloso o-ngedesa'mive luvoni' nene nemu' noluve: Evene' ma O'moso'mo lou' gamazi've lo-ngemamivo hazu minave ado' Zuda ve minamave nete li-hime dalizani' nene O'moso'mo louto' do molo ize' ma molo-ngedamoloseiha nesi mo ha vi tolovo ilisave. Ido' O'moso'mo lou' gamazi've lo-ngemavo gili minave Zuda ve nene lou' di minisasi lihime dalizave nene O'moso'mo a'mine louto' do molosa ize' molo-ngedo lihime ngemeleseive.

**13** Ee, O'moso'mo evene' mamu' ve lisihe' ve lo lo-ngedaa' neive nene evene' ma ingine lou' gamazi nene ha ga'inedunukovo' gilaa' avemu' nene losa'mive. Asi lou' gamazi'mo lido' iga' avevo' nene ve lisihe' ve lo lo-ngedaa' neive.

**14** Ido' naza luvoni' ma nene me gililo: Zuda ve minamave ado' O'moso'mo lou' gamazi've lo-ngemavo damave ingine engi' ngemeni dame-nillo' di mili igi mili iliza inite' nene lou'

gamazi'mo lido' vo milise' o mineline' ne'mo nene mo O'moso'mi lou' nene engi' lu'ningu' neive.

<sup>15</sup> Ido' engi' ne'mine igi mili minaa' nani' ne'mo nene lou' gamazi'mo lo neine' gamazi lu'ningu' neine' nene do soto' ogo lelebize neive. Ingine iga' nani' initekumu' nene engi' lu'ine ga'ine ne'mo gamene ma nene di lamine' ikeve laa' ido' gamene ma nene di goloso ikeve lo lo-ngemaa' neine' nenako nemu' nene a'mine ne'mine lu'ine ga'ine engita minaa' neine' ne'mo nene naza lamine' luvoni' nene do soto' ogave.

<sup>16</sup> Ido' O'moso'mo lavo Izusu' Kilisito' nene ezelo' medelo mino evene' laza suno' ogo molo oga' noune' inite' ize' molaline' gamenelo' nene nen'i mene noluvoni' ne'mino mineleseive. Ee, naza gamazi lamine' lo soto' soto' oga' nouvon'i ne'mo nene a'mine gamazi mene lo soto' neive.

*O'moso'mi Evenele Gihile None Laa' Ave Zuda  
Ve Nene O'moso'mi Evenele Gihile Minaali'mi  
Monovo Paulo' Lo-ngimine' Gamazi*

<sup>17</sup> Ido' gaza Zuda ve nolinive nene gelezo. Zuda ve nouve losa O'moso'mi lou' gamazi Mose' gizo limine' ne'mo nene O'moso'mo goni' o-ledelinguti' nene ha do nu' izeleseive lo gelo a'mido' gele medele mino okonga do dizo O'moso'mi evenele nouve laa' nane.

<sup>18</sup> O'moso'mi lou' gamazi nene apize gimikevo gele naine' nenako nemu' nene O'moso'mo gei' iline lo lulou' gele neine' nene gaza mo ninga gelosa monovo ma ivile' ogo monovo lamine' gehepeve nene do kegeso ningaa' nane.

**19-20** Ne'mine anidi'mo nene gaza ti' lo laa' nane: Mose' gizine' lou' gamazi nenita neingu' nene gamazi monovo vaikisi gamazi gihile lamine' vaikisi neivosa nene naza lu'ine'mi vele likavo nizave aka ngelebizedodo' mino liti'musou' minave neti livi'ine ne'mine mino ido' gamazi gilamave ngele'mize hehe lolodo' mino mono' gilami izipe ngomo ne'mine minave inite' apize ngemaa' olodo' mo lisihe' o nouve lo amuzo molo gelaa' nane.

**21** Nemu' nene gaza evene' ma apize nge-maa' naine' gamazilo' nene geikisi gele dalinako gele dosa'mane. Ee, gaza gumine amozo lo evene' lo-ngemaa' noogosa gaza nene gumine oga' noolosane.

**22** Ido' vene' vemoho' lili' ikeni' nete vene' vemoho' masi gopo ingamilo laa' noogosa gei' nene ne'mine oga' noolosane. Gaza soza o'mosomu' nene muso gaka dizavo olovo' oga' noogosa soza o'mosoliti numunguti' inite' gumine oga' noolosane.

**23** Ido' gaza O'moso'mi lou' gamazi nene gele nouve lo okonga do dizaa' nanive neke nene a'mine lou' nene avuto' ogosa O'moso'mi gulive do lemaa' noolosane.

**24** Ne'mine noluvoni' nene mono' godolou' gamazi ma ti' li gizi nizani' nene lengito' vo davosa noluve:

Zuda ve lengi' monovotine nene heta ato' ve ingine ningisa

O'moso nene divi ledivi' iga' nave.

**25** Zuda veti okodido' O'moso'mi noso mili-lingidaa' nani' ne'mo nene lingine O'moso'mi lou' gamazilo' e'meti minilizani' nene mo hize

ele' o-lengedeleseive. Ido' okodida O'moso'mi noso neivo mini lou' gamazi avuto' igi minilizani' ne'mo nene O'moso'mi noso lengita neine' ma nene hazza nite' lolo' ogavo nomivo nizani' gele-leseive.

**26** Ne'mine o neine' nenako ve ma ingine oko'nida O'moso'mi noso nomivo nilizadite O'moso'mi lou' gamazi gili di minaa' niilizani' nene O'moso'mo gilivo ei' noso've nene mo engi' oko'nida mineleseive.

**27** Ido' ve ma oko'nida O'moso'mi noso nomivo mini O'moso'mi lou' gamazilo' e'meti osu' lilizadite nene lengi' mono' godolo di minisasi ido' O'moso'mi noso okodida mili-lingidikevo minisasi O'moso'mi lou' gamazi avuto' iga' nave lengi' nene losuvotine ilavo monovotine nene soto' oloseive.

**28** Ee, O'moso'mi evenele gihile Zuda ve minaa' ne'mi gihile nene okode losuvolot'i nene ma soto' osa'mive. Ido' a'mine'mine ogo O'moso'mi noso do minaa' ne'mi gihile nene O'moso'mi noso ve li okode lolovo huki hulaa' nadot'i nene ma soto' osa'mive.

**29** Asi O'moso'mi evenele Zuda ve minaa' ne'mi gihile nene luteu' haleko minine' lemeni dame-nilot'i nene soto' oga' neive. Ido' O'moso'mi noso gihile nene lou' gamazi gizi nizado' nene ha okode losuvolot'i e'meto okode lolovo huko hulaa' neve nene nevoba asi O'moso'mi Sikalahu' ne'mo luteu' molo-ledaa' neine' lemeni dameni nene neive. Ne'mine lemeni damenisi Zuda ve gihile minelonivemu' nene evenelite lopo'ni lilizavoba asi O'moso'mo loloseive.

**3**

*O'moso'mo Zuda Ve Hize Ele' O-ngedo  
 Gamazi've Lehize-ngidine'za A'mine Lido' Nene  
 Azasi Gele Do Mino A'mido' Gili Damave Nene  
 Lihime nGemelido' Lisihe' O Neive Lo Paulo' Line'  
 Gamazi*

<sup>1</sup> Ido' naza nene ne'mine luvoni' nemu' nene Zuda ve lingine lutingu' nene gopo gatine gili longo' ne'minisa ilizani' o neive: O'moso'mo ningivo Zuda vesi ido' heta ato' vesi nene mo lisi-hekovo' o minaa' noune' noline' nene laza Zuda ve minuningumu' Zuda ve minamave ngivile' ogo hize ele' o-ledaa' neine' nene nanitedunu' hize ele' o-ledaa' neive. Ido' laza O'moso'mi noso okodela molaa' noune' neloti' nene inite' lamine' nene nanite' soto' o-ledaa' neive li longo' ilisave.

<sup>2</sup> Ne'mine ilisaha inite' lamine' vai' goloso vauve elosa lelita neive. Inite' naba gana' nene O'moso'mo lo huko lo-lidine' gamazi've nene Zuda ve leli' nene di minilizave losa lehize-lidine' ve.

<sup>3</sup> Ne neiha Zuda ve linge ma nete nene a'mine O'moso'mo lehize-lidine' gamazilo' nene e'metamani' ve. Nemu' nene ve malite nene ti' li longo' ilisa gili nilisave: Inge gamazi'velo' e'metamani' nemu' O'moso'mo a'mine gamazilo' e'meto amilido' o neihe.

<sup>4</sup> O'ove. E'metamilivoba asi a'mine gamazi'velo' nene ha mo e'meteleseive. Evene' vai' nene sozalo' vevo' minilisaha O'moso neve nene gamazi gihile laminekovo' laa' ive mineleseive. Ne'mine neingumu' nene mono' godolou' ti' li gizi nizani' ma neive: Ne'mino neine' nene nanitekumu' ve.

O'mosoo, gaza gamazi lisihekovo' liline' o neine'  
nene mo  
soto' neivo goniku' nesi nene gasika ngivile'  
olosane lo neive.

<sup>5</sup> Nem'u' nene naza mene evenelite iga'  
nani' monovolo' do molo ti' lo noluve: Laza  
monovo goloso ogo molo oga' noune' ne'mo  
nene O'moso'mi monovo lisihe' lamine' nene do  
soto' o-daa' neine' nenako O'moso aza monovote  
golosomu' lihime lemeline' nem'u' nene monovo  
do goloso ogave lo ha lo-delonido' o neihe.

<sup>6</sup> O've. Mo keke' ne'mino nomive. Ido'  
ne'mine minidiniko O'moso'mo me misubou' ye  
muki' ize' molo-ledeline' nenako nado ize' molo-  
ledelido' lisihe' o minidine.

<sup>7</sup> Ido' ve ma ti' lo loloseive: Naza soza gamazi  
luvodiniko O'moso'mo nenikumu' lihimelo' ve  
minane lo lihime nimidine. Ne neiha evene'  
nete a'mine soza gamazi'nemu' gililizadot'i nene  
O'moso'mo gamazi gihile laminekovo' laa' neine'  
monovo've nene soto' gehepeve ogavosa ezemu'  
nene gohi opo'ni li di naba igi li-dilizado' idine.  
Ido' ne'mine idiniko naza inite' lamine' do soto'  
uvoni' gildine. Nem'u' nen'i nene lihimelo' ve ve  
lo lihime nene nanimu' nimidine.

<sup>8</sup> Ee, ve malite lelikumu' nene divi ledivi' igi  
ti' li laa' nave: Paulole laa' nani' nene ne'mino  
neive: Monovo goloso ne'mo monovo lamine'  
do soto' iline' nenako nem'u' ne'mine ilingumu'  
ve lo laza nene ha monovo goloso ogo molo  
minelesune. Ido' ne'mine laa' nene mo lamine'  
nehe. O've. O'moso'mo ne'mine laa' ave nene  
lihime ngemelido' lisihe' i nizave.

*Evene' Mukikuti' Nene O'moso'mi Velelo'  
Ve Lisihe' Hamokisi Minamune Lo Paulo' Line'*

*Gamazi*

<sup>9</sup> Neloti' nene laza nadive lo gelelone. Zuda ve leli' nene evene' linge muki' ngivile' ogo lamine' nobe. O'ove. Ne'mino minamune. Mo Zuda vesi a'mine Zuda ve minamavesi nene mo lihime monovoli'mo nene adelo' do minivevo' none lo naza mo lo-lengemekuvoni' ma ve.

<sup>10</sup> A'mine me luwon'i gamazi ne'mo nene mono' godolou' gamazi ma ti' li gizi nizado' vo do neive: Me misubou' nene evene' lisihe' lihime'vesi nomive nene  
mo keke' hamokisi ma nomive.

<sup>11</sup> Aka laminekumu' ningi gilave nene hamokisi ma nizamave.

Ido' O'moso ningelone li ezemu' vise' iga' ave nene mo keke' ma nizamave.

<sup>12</sup> Ido' evene' muki' nene aka lamine' huli zovo' izi visa vi goloso nave.

Ve ma monovo laminekovo' i di vi minaa' ave nene  
mo keke' hamokisi nizamave.

<sup>13</sup> Lu'ninguti' vomine gamazi laa' nani' nene gonoso galese ngolo' lo mininguti' unuvo goloso oga' neine' ne'minosa nene neive.

Ido' gamazi laa' nani' nene evene' go'ine izisavo' nene laa' nave.

Ido' sata' ume nete evene' ongovuso' ngibilaa' nani' ne'mino  
ingine gamazi laa' nani' ne'mo nene ngebelaa'  
neive.

<sup>14</sup> Ido' engita gamazi goloso ekese' lo-ngedaa'  
monovo nene ve'ningu' vai' lo neive.

<sup>15</sup> Ido' gize'ine ne'mo nene evene' ngebelaa'to'  
lite' lo ngele'mizo vaa' neive.

<sup>16</sup> Ido' zaa' zaa' akalo' vilizahe a'mida nene

inite' mata' di goloso gehepeve iga' ido' evene'  
geni ngimaa' ne'mine iga' nave.

**17** Ne'mine igi minisa ingine hongu lo lamino  
minaa' aka nene mo keke' ningamave.

**18** Ido' O'mosomu' golise gelaa' monovomu' nene  
mo ningi gilisa'mave.

**19** Ido' O'moso'mi lou' gamazi'mo ne'mine line'  
nene a'mine lou' gamazi'mi gesi mingu' min-  
univemu' line' nene mo gele none. Ne'mine  
line' nene me misubou' aleve muki' laza lolone'  
gamazi nomivo lu' izo mino O'moso'mi velelo'  
goni' o-ledelido' lisihe' ogo mineloningumu' nene  
ne'mine line' ve.

**20** Nemu' nene O'moso'mi lou' gamazilo'  
e'metelesa olonidot'i nene evene' hamokisi  
O'moso'mi velelo' nene gamazite nomine' ngelo  
minamolosune. Nanitekumu' ve. A'mine lou'  
gamazi ne'mo nene lihime daa' monovo danava  
nene do soto' gehepeve ogosa lelebizaal' neive.

*O'moso'mi Velelo' Evene' Lisihe' Minelone'  
Nene Izesu' Kilisito'nimu' Gele Ele'vole' Ogosavo'  
Minelesune Lo Ne'mi Monovo Paulo' Lo-ngimine'  
Gamazi*

**21** Ne neiha O'moso'mi velelo' evene' lisihe'  
mineloningumu' nene louto' e'metaa' aka ne'mo  
nene vo damivo O'moso'mo a'minemu' gele hulo  
aka ato' nene idise do soto' o-lede neive. A'mine  
akamu' nene O'moso'mi gamazi ne'mosi livo ido'  
polohetelite gizani' gamazi ne'mosi livo setato'  
a'minemu' nene li soto' asine' ve.

**22-23** A'mine aka nene ne'mino neive:  
O'moso'mo evene' lisihe' ve lo-ngedeline'  
nene ingine Izesu' Kilisito'nimu' gili ele'vole'  
i nizangumu' ve lo Izesu' Kilisito'nimu' gili

ele'vole' ave mukikumu' nene loloseive. Ee, evene' muki' nene lihime daa' noune' nenako O'moso'mi emeni dameni lamine' goloso nene do ti' olonido' lisihe' amune. Nemu' nene O'moso'mo Zuda ve nene ve lisihe' ve lo-ngedeline' aka nene ato' ma neivo Zuda ve minamave nene ve lisihe' ve lo-ngedeline' aka nene ato' ma neivoba asi mo aka hamokovo' nene neive.

**24** Ne'mino neine' nenako O'moso'mo ve lisihe' ve lo-ledeline' nene laza ne'mine lo-ledelido' lisihe' amuba haza ei' lulolo' do molo nasahili' o-ledo ve lisihe' ve lo-ledeleseive. Ne'mine lo-ledeline' nene Izesu' Kilisito' aza lihimetemu' golo hizo helo kuluhize-ledaa' aka do soto' ine' nemukovo' nene ve lisihe' ve lo-ledeleseive.

**25-26** Ido' O'moso'mo kuluhize-ledeline' aka Izesu' Kilisito' do soto' ine' nene aza leli' lihimetemu' nene ei' vanise've hulo hilingumu' nene gele ele'vole' okunivo ne'mo nene O'moso'mi izebolo've lelikumu' nene do mate-delive losa ele'mize molavosa kuluhize-ledaa' aka nene do soto' ine' ve. Izesu' ne'mine ilive lo O'moso'mo ele'mize molani' nene gomukuti' lihime daa' ani' mamu' nene gelo geto lihime ngemamo hongu lo mino ninge mate-ngidine' nenako nemu' nene ei' monovo've lisihe' o neine' nene ningi gililizave lo lelebizelesa ele'mize molani' ve. Ido' ele'mize molani' nene idise gamenela ei' monovo've lisihe' nene ado' ve lisihe' minosasi ido' Izesu'nimu' gele ele'vole' nolonivemu' nene ve lisihe' ve ha lo-ledelido' lisihe' o neine' nene lelebizelesa ele'mize molani' ve.

**27** Ne'mino laza ve lisihe' ve lo-ledelido' lisihe' minamosa haza Izesu' Kilisito'nimu' gele ele'vole' unidotikovo' O'moso'mo ve lisihe' ve

lo-ledaa' neine' nenako laza okode do dizelonido' nene lisihe' amive. Okode do dizelone' aka nene mo hize tile lamine' ogave. Nene nanitekumu' ve. La'lisetet lou' gamazilo' e'metekunivosa O'moso'mo ve lisihe' ve lo-lididiniko a'mine aka nene hize tilamidine'za asi Kilisito'nimu' gele ele'vole' okunivosavo' nene ve lisihe' ve lo-ledaa' neine' nenako nemu' nene leli' okode do dizaa' aka nene mo hize tile lamine' ogave.

<sup>28</sup> Ee, laza ti' lo gele none: O'moso'mo evenekumu' ve lisihe' ve lo-ledeline' nene lou' gamazilo' e'mete osu' lube lamube nemu' gele hulo Izesu' Kilisito'nimu' gele ele'vole' okunivosavo' nene ve lisihe' ve lo-ledeleseive.

<sup>29-30</sup> Lingine gilavo O'moso nene Zuda ve minamaveti O'moso'ine minamo Zuda veti O'mosotevo' neihe. O'ove. O'moso nene hamokovo' neine' nenako nemu' nene aza mo Zuda ve minamave neti O'moso'inesi nene mino O'moso'mi noso okodela mulunive Zuda ve nene a'mine Kilisito'nimu' gele ele'vole' okunivo ne'mo nene ve lisihe' ve lo-ledaa' ogo ido' O'moso'mi noso oko'nida milisa'maye heta ato' vesi nene a'mine Kilisito'nimu' gili ele'vole' ikevosavo' nene engikisi O'moso'mo ve lisihe' ve lo-ngedeleseive.

<sup>31</sup> Nemu' nene malite ti' li longo' ilisave: Ne'mino neine' nenako Kilisito'nimu' gele ele'vole' oga' ne'movo' nene O'moso'mo ve lisihe' ve lo-ledelido' lisihe' o neive li likenako lingine nene louli'mi gono nene mo osu' lave lisa nilahe. O'ove. Laza mo keke' ne'mine lamune. Asi laza ne lou' nene hize ele' noo-dune.

*Gomu' Abalahamu'ni O'moso'mo Ve Lisihe'  
Ve Lo-dine' Monovo've Malo' Nene Ningo  
Geleloningumu' Paulo' Line' Gamazi*

<sup>1</sup> Nemu' nene laza leli' Zuda veti zuho do soto' ive avoteho Abalahamu'nida soto' ine' initie' mamu' nene laza a'mido' do molosa lo gele ha gele ogo gele lone.

<sup>2</sup> Abalahamu' nene aza monovo laminekovo' ogo molo minidot'i O'moso'mo ve lisihe' ve lodidiniko aza nene ei' oko'no do dizelido' lisihe' o minidine'za O'moso'mi velelo' nene aza ne'mino ma minamidine.

<sup>3</sup> A'minemu' nene mono' godolou' nene nadive li gizi nizani' neve. Mene gililo:

Abalahamu' aza O'mosomu' gele ele'vole' o minavo

aza nene ve lisihe' ve lo-dine' ve.

<sup>4</sup> Ve mali'mo ve malo' gono davo a'mine ve meni emeline' nene haz a gidini noimuve lo gelosa emelivoba asi nenito' gono nodavo dina' neine' nene golo nohizuve lo gele minosa meni nene emeleseseive.

<sup>5</sup> Ido' a'mine'mine ogo laza ogo molo olone' ne'mo O'mosolo' gono nodune' gilivo mino monovo lamine' gehepevelokovo' e'metunidiniko O'moso'mo a'mido' golo hizo meni ne'mine lemo ve lisihe' ve lo-lididine'za mo ne'mino nomive. Nemu' nene ve ma laza a'mine ogo molo olone' initetot'i nene menite ne'mine ve lisihe' ve lo-ledelido' nomive lo gelosa ido' O'moso aza nene lihime'inesi vemukisi ve lisihe' ve lo-ngedaa' ive ve lo laza ogo molo olone' initeto' nene gele medelamo ezemu' haz a gele ele'vole' olone' nene aza ezemu' gele

ele'vole' oloningumukovo' nene ve lisihe' ve lo-ledeleseive.

<sup>6</sup> Ido' neni' luvoni' ne'mino Davidi' aza O'moso'mo evene' igi mili minani' monovomu' nene gele hulo ve lisihe' ve lo-ngedelive nene ngolize izilizado' lisihe' i nizave lo ti' lo line' ve:

<sup>7</sup> Ve ma lou' gamazi've avuto' angumu' nene O'moso'mo gele hulo lihime'ine hulo-ngedelive nene ngolize izilizado' lisihe' i nizave.

<sup>8</sup> Ee, ve ma lihime'ine O'moso'mo do-ngede minamilive nene ngolize izilizado' lisihe' i nizave.

<sup>9</sup> Lingine gilavo a'mine ne'mino lolize izelonido' lisihe' oga' monovo mene O'moso'mi noso okodela mulunive Zuda velavo' soto' oga' neine' nehe ido' O'moso'mi noso oko'nida milisa'mave Zuda ve minamavelasi soto' oga' neine' neve. Nemu' nene lo gele ha gele olonge. Gililo. Laza ti' lo laa' none: Abalahamu' O'mosomu' gele ele'vole' ine' ne'mo O'moso ezemu' ve lisihe' ve lo-dine' ve. Nemu' nene a'mine luvoni' monovo nene O'moso'mi noso oko'nida milisa'mavelasi soto' oga' neive lo ninga gele none. Nanitekumu' ve.

<sup>10</sup> O'moso'mo lihime'vemu' gele hulo Abalahamu'ni ve lisihe' ve lo-dine' monovomu' nene gohi gelosa gele lone. Abalahamu' oko'nola O'moso'mi noso molosa neivo O'moso'mo ve lisihe' ve lo-dine' nehe olihe O'moso'mi noso oko'nola molamivosa lo-dine' neve. O'moso'mo ve lisihe' ve lo-dine' nene oko'nola O'moso'mi noso neivosa nevoba asi olihe nomivosa ve lisihe' ve lo-dine' ve.

**11** Ne'mine ogo Abalahamu' oko'nola O'moso'mi noso nomine' mino O'mosomu' gele ele'vole' ogo minine' nemu' nene O'moso'mo ve lisihe' ve lo-dine' nene do soto' olosa a'mine noso nene ei' oko'nolo' nene molani' ve. Ne'mine ine' nenako Abalahamu' aza O'moso'mi noso oko'nida nomine' minisa O'mosomu' gili ele'vole' ilizadot'i nene O'moso'mo ve lisihe' ve lo-ngedeliveti me'nibo lolo' ine' ve.

**12** Ne'mino engi' me'nibo lolo' ogo minine' nene laza O'moso'mi noso okodela mulunive linge maliti meteho nesi neive. Ado' laza nene avoteho Abalahamu' O'moso'mi noso oko'nola nomivo mino gele ele'vole' ogo minine' monovo'velo' e'meto mino O'moso'mi nosovo' nene okodela mulunivoba asi gele ele'volekisi o noniveti meteho nesi nene neive.

*O'moso'mo Lemelove Lo Lo Huko Salani Mololidine! Init'e Dalone! Nene Louto! E'metelonidot'i Dalonivoba Asi O'mosomu' Gele Ele'vole' Olonidotikovo' Nene Dalosune Lo Paulo' Line' Gamazi*

**13** Ido' naza ne'mine noluvoni' nene memu' luve: O'moso'mo Abalahamu'ni misubo muki' nene ei' a'vopilemokisi salani molo-lengedekuve lo lo huko-dine' nene lou' gamazi gomukuti' ma minido' e'meto miningumu' nevoba asi O'mosomu' gele ele'vole' ogo miningumu' nene O'moso'mo ve lisihe' ve lo-dine' nenako nemu' nene a'mine salani gamazi lo huko-dine' ve.

**14** Ee, lou' gamazilo' e'metelonidot'i nene a'mine salani init'e nene ma dunidiniko O'mosomu' gele ele'vole' oga' monovo nesi ido' a'mine O'moso'mo Abalahamu'ni lo huko-dine' gamazi nesi nene vi haza nite' lolo' asidine.

<sup>15</sup> Naniteli'mo ve. Lou' gamazilo' e'metaa' ne'mo nene O'moso'mo izebolo' molavo lihime lemeli akalo' lele'mize molaa' neive. Ne neiha lou' gamazi ma minamilidokovo' nene lou' gamazi avuto' olone' aka ma minamoloseive.

<sup>16</sup> Nemu' nene a'mine salani inite' dalone' nene mo O'mosomu' gele ele'vole' olonidotikovo' nene haza gidini doso' o neive. Ee, a'mine lo hukolidine' inite' nene O'moso'mo haza nasahili' olididi'movo' nene Abalahamu' a'vopilemo' zuho muki' ado' Mose' lou' gamazi'mi gesi mingu' nonivesi ido' a'mingu' minami Abalahamu' aza O'mosomu' gele ele'vole' idi'mine igi gili ele'vole' ilizavesi nene laza mukito' dalonido' lisuhe' o minelive losa lehize-lidine' nenako gele ele'vole' olonidotikovo' nene haza gidini doso' o neive. Abalahamu' nene a'mine ne'mino dalonive mukiliti meteho nene neive.

<sup>17</sup> Ne'mino meteho minine' nene a'minemu' O'moso'mo line' gamazi mono' godolou' ti' li gizi nizani' ma neive:

Naza nene evene' zuho ato ato' mukiliti avo'nibo mineline lo  
gele'mize molokuve.

Ee, O'moso'mi velelo' nene a'mine lo huko line' gamazi nene mo ele'vole' o neive. Ido' O'moso aza nene hilavemu' gohi ve'ine gizilizave lo hilanguti' nene gohi do ote-ngedaa' ive mino ido' olihe soto' amani' inite' nene mo soto' ani' gilivosa a'minemu' nene ha lo soto' oga' ive nesi neive.

<sup>18</sup> Ido' Abalahamu' nene O'moso'mo lo hukolidine' inite' soto' o-delinel' aka nene nomine'za aza nene a'mine inite' soto' iline' aka nene mo ninge minine' gelavo mino aza nene O'moso'mo

ga'vopilemo' nene ne'mini muki' soto' ilisave lo  
lo-nimido' nene gihile izavo evene' zuho ato ato'  
mukiliti avo'nibo ha lolo' olosuve lo gele ele'vole'  
ogo minine' ve.

<sup>19</sup> Ido' ne'mino gele ele'vole' ogo minine' nene  
aza kilisimasi've vanu hadeti (100) ne'minesi  
mino oko'no've nene gilisupo molangumu' nesi  
nene ha gele mino ido' Sala' aza nesi nene eleni  
molavo izipe gedeline' gamene nene osu' lavo  
minine' neemukisi nene mo ha gele minine'za  
gele ele'vole' ogo minine' nene matamine'.

<sup>20</sup> A'mine ne'mino O'moso'mo lo-dine' nemu'  
nene gele hepe' lizo gala seta' gelamine'za  
gele ele'vole' ine' ne'mo amuzo molo minavosa  
O'moso nene opo'ni laa' ine' ve.

<sup>21</sup> Ido' a'mine gamazi lo huko-nidive O'moso  
ne'mo a'mine gamazi nene do gihile izelido' mo  
lisihe' o neine' nenako ha do gihile izeleseive lo  
gele mu'musi' gehepeve ogo minine' ve.

<sup>22</sup> Ne'mine ogo minine' nenako a'neemu' nene  
O'moso'mo ve lisihe' ve lo-dine' ve.

<sup>23</sup> Ido' O'moso'mo ne'mino ve lisihe' ve lo-dine'  
mono' godolou' gizi nizani' nene eikumukovo'  
neive li gililizave lisa gizi nizani' nevoba

<sup>24</sup> asi Guvetesi ve Izusu' Kilisito' hilinguti' do  
ote-dive O'mosomu' gele ele'vole' ogo minunivo  
O'moso'mo ve lisihe' ve lo-ledelive lelikumukisi  
nene gizi nizani' ma neive.

<sup>25</sup> A'mine Guvetesi ve Izusu'ni nene leli' lihime-  
temu' medelo helelive lo O'moso'mo eveneliti  
a'ningu' molavo helavosa leli' nene ve lisihe' ve  
lo-ledeline' aka velo hilinguti' nene gohi do ote-  
dine' ve.

## 5

*O'mosomu' Gele Ele'vole' Okunivo Aza Ve  
Lisihe' Ve Lo-ledeline' Ne'mi Gihile Lelita Mineline'  
Monovomu' Nene Paulo' Line' Gamazi*

<sup>1</sup> Nem'u' nene ezemu' gele ele'vole' unidot'i' nene O'moso'mo ve lisihe' ve lo-ledavo mino O'moso'mo lelikumu' izebolo' molani' nene mateline' aka Guvetesi ve Izesu' Kilisito' velavo ne'mo nene O'mososi lezesi vovoteu' nene gamazisi nomivo lamine' none.

<sup>2</sup> Ee, idise mela O'moso'mo nasahili' noo-lidivo none' aka nene a'mine Guvetesi ve ne'mo vele-ledavosa a'mingu' none. Ido' a'mingu' mino O'moso'mi emeni dameni lamine' nene mudise do leli' olosune lo a'minem'u' nene gilingili ogo gizebo ogo lolize izo minaa' noune.

<sup>3</sup> Ido' nemukovo' lolize izesa'mune. Laza geni initeli'mi lulou' minelone' ne'mo nene O'mosomu' gele ele'vole' ogo mino geni gehe do dizo minelone' amuzote do naba o-ledaa' neive lo gele mino geni inite' lelita miningu' nesi nene a'mine genimu' nene ha lolize izo minaa' noune.

<sup>4</sup> Ido' O'mosomu' gele ele'vole' ogo mino geni gehe do dizo minelone' ne'mo nene O'moso'mo ninge lamine' iline' lemeni dameni nene do soto' o-ledeleseive. Ido' O'moso'mo ninge lamine' iline' lemeni damenisi minelone' ne'mo leli' nene O'moso'mo do eita oloseive lo laza gele mu'musi' olonido' nene do lisihe' o-ledaa' neive lo nesi nene gele none.

<sup>5</sup> Ido' a'mine gele mu'musi' une' inite' nene vo haza ogavo lovozo ngelo ma helamolosune. Nene nanitekumu' ve. O'moso'mo ei' Sikalahu've lehize-lidine' ne'mo nene luteu' gono do O'moso'mo vauve elo lulo limine' ne'mi

monovo nene do soto' ogo lelebizaa' neine' ne-nako nemu' nene a'mine gele mu'musi' une' inite' nene vo hazo ogavo lovozo ngelo ma helam-olosune.

<sup>6</sup> Ido' O'moso'mo lulo vauve elo limive lu-voni' nene neemu' luve: Laza nene O'moso e'metelonido' minamo lute gilizevosi ha nonivo O'moso'mo molani' gamene nene lisihe' ogavo Kilisito' nene a'mine O'moso e'metamunivemu' nene medelo hiline' ve.

<sup>7</sup> Evene' lisihe' gehepeve nene bililisa navo ma evene' hamoli'mosi ezelo' medelo helelove lo ngelo ma lamoloseiha ma lilin'e nene laza amoso' inite' nene olosa lave lo ha gelelesune. Ido' evene' lamine' gehepevelokisi nene medeli evene' muki' nete ngeli ma hilamavo hamo hamolitevo' nene helaakumu' golise gilani' nene gili huli amuzo mili ma hililizah lo gele nouve.

<sup>8</sup> Ne neiha O'moso'mo lulo atoli'mine ogo leme neine' nene ne'mino do soto' ogo lelebizave: Laza nene ha lihimelo' ve nonivo Kilisito' aza evene' amiliza inite' gehepeve ogo lelito' medelo hiline' ve.

<sup>9</sup> Nemu' nene ti' lo gelelesune: Kilisito' aza lelito' medelo lihimetemu' vanise've hulo helavo nemu' nene O'moso'mo idise ve lisihe' ve lo-ledavo none' nenako nemu' O'moso'mo evenekumu' izebolo' molani' nene Kilisito' do matosa lihime lemelinguti' do lu' izelingumu' nene mo gele mu'musi' olonido' o neive.

<sup>10</sup> Ido' ne'mine noluvoni' nene nemu' noluve: Laza O'mososi biluva' ogo noningu' nene ei' O'moso'mi gipele nene lelikumu' helo O'mososi do hamo' o-lidine' nene mo amoso' inite' dani' nenako nemu' nene laza O'mososi do hamo' o-

ledavo noningu' nene aza hilinguti' gohi minevo'  
alevo' o neine' ne'mo nene haz a ilido' o neine'  
inite' ogo mudise do lu' izeleseive lo gele  
mu'musi' gehepeve olosune.

<sup>11</sup> Ido' neevo' nevoba asi Guvetesi ve Izesu' Kilisito' ne'mino idise O'mososi do hamo' o-ledavo  
none' ne'mo nene O'mosomu' lolize izo minaa'  
noune.

*Adamudati' Nene Helaa' Monovo Soto'  
Ogavosa Kilisitodati' Nene Helaakuti' Otosa  
Minevo' Minevo' Oga' Monovo Nene Soto' Ine'  
Ve Lo Paulo' Line' Gamazi*

<sup>12</sup> Nem u' nene laza ti' lo gele none: Me misubou' lihime soto' ine' nene ve hamoli'mo do  
soto' ogavo a'mine lihime ne'mo nene helaa'  
monovo do soto' ine' ve. Ne'mine ogavo evene'  
muki' nene lihime daa' noune' nenako helaa'  
nene leli' mukita soto' o limine' ve.

<sup>13</sup> Ee, Mose' lou' gamazi olihe soto' amivosa  
me misubou' nene evene' lihime daa' ani'za  
lou' nomida nene O'moso'mo lihime do molo-  
ngedamaa' neine' ve.

<sup>14</sup> Ne neiha lou' nomine' gameneu' nene ado'  
Adamu' minidot'i mine do dizo vo Mose' lou'  
gamazi dani' gamenela nene evene' soto' igi  
mini'mi ave muki' ingine Adamu'ni O'moso'mo  
lo huko-dine' gamazi avuto' idi'mine igi lihime  
ma damani'za inginesi nene helaali'mi gesi min-  
gukovo' mini hilaakovo' ani' ma neive. Ido'  
Adamu' neve nene alinge' soto' ilivemu' ha  
avazaha've ne'minosa nene soto' ine' ve.

<sup>15</sup> Ne neiha a'mine evene' hamoli'mo api' ogo  
O'moso'mo lo huko-dine' gamazi avuto' ogo li-  
hime dadoti' nene evene' muki' helaa' noune'za  
a'mine Adamu' lihime dani' nene ivile' goloso

ivosa O'moso'mo nasahili' o-lidine' nene evene' hamo' Izesu' Kilisito' ne'mo haz a gidini vauve elo a'mine nasahili' nene evene' mukito' do soto' o-lidine' nenako nemu' nene Adamu'ni O'moso'mo lo huko-dine' gamazi avuto' ine' ne'mi gihile nene atoli'mine ogo neivo ido' O'moso'mo nasahili' o-lidine' ne'mi gihile nene atoli'mine ogo neivo ato atoli'mine igi nizasive.

<sup>16</sup> Ee, a'mine evene' hamoli'mo lihime dani' ne'mi gihile nene atoli'mine ogo neivo O'moso'mo haz a gidini o-lidine' initeli'mi gihile nene atoli'mine ogo neive noluvoni' nene nemu' noluve: A'mine lihime hamo' dani' ne'mo nene O'moso'mo goni' o-ledo lihime lemaa' neine' nene do soto' ine'za laza gamazi've avuto' vai' oga' noune' neivosa O'moso'mo nene haz a gidini o-lidine' initie' ne'mo nene aza gamazite do helo ve lisihe' ve lo-ledaa' neine' nene do soto' ine' ve.

<sup>17</sup> Lamine!, evene' hamoli'mo O'moso'mo lo huko-dine' gamazi gana' avuto' idoti' nene evene' laza helaali'mi gesi mingukovo' mino helaa' noune' nenako ido' ve hamo' Izesu' Kilisito' o-lidine' initie' ne'mo helaa' nene ivile' goloso ogavosa O'moso'mo vauve elo nasahili' o-ledelidoti' ve lisihe' ve lo-ledelive laza nene guvetesi ve ne'mine lolo' ogo minevo' minevo' ogovo' minelesune.

<sup>18</sup> Nemu' nene ti' lo gelelesune: Ve hamoli'mo O'moso'mi gamazi avuto' idoti' nene evene' muki' nene O'moso'mo goni' o-ledo lihime lemelido' o none' ne'mino ve hamoli'mo monovo lisihe' gehepeve ogo molo idoti' nene O'moso'mo gamazite do helo ve lisihe' ve lo-ledavo evene' muki' minevo' minevo' ogo minelonido' o none'

ma neive.

<sup>19</sup> Ee, evene' hamoli'mo O'moso'mi gamazi gele hulidoti' nene evene' muki' lihimelo' vevo' lolo' une' ne'mino ve hamoli'mo O'moso'mi gamazi gele do osu' lidoti' evene' muki' nene ve lisihe' lolo' olosune.

<sup>20</sup> Ne'mine o neiha O'moso'mo lou' gamazi've do soto' ine' nene lou' avuto' ogal' monovo nene naba o'mo vo minelive losa do soto' ine'za lihime daa' monovo naba o'mo vo minida nene a'mine naba o'mo vine' votigile nene ivile' goloso ivosa O'moso'mi nasahili' nene atoli'mine ogo soto' ogo minine' ve.

<sup>21</sup> Ido' ne'mine ine' nene nanitekumu' ve. Lihime daa' monovo ne'mo helaali'mi gesi mingu' hulo-ledavo a'mingu' mino helaa' noune' ne'mino Guvetesi ve Izusu' Kilisito' gono dani' ne'mo nene evene' lisihe' lolo' o-ledo O'moso'mi nasahilili'mi gesi mingu' hulo-ledavo a'mingu' mini minivo' minivo' ilizave losa ne'mine ine' ve.

## 6

*Laza Nene Kilisitolesi Maka' Hilune' Gelavo  
Lihime Daa' Monovote Osu' Lavo Kilisitolesi  
Maka' Oto Gohi Minevo' Alevo' Ogo None'  
Gelavo Monovo Lisihe' Laminekovo' Ogo Molo  
Mineloningu'mu' Paulo' Line' Gamazi*

<sup>1</sup> Ido' lihime daa' monovo naba o'mo vo minida nene a'mine naba o'mo vine' votigile nene ivile' goloso ivosa O'moso'mi nasahili' nene atoli'mine ogo soto' ogo minine' nenako nemu' nene laza nadive lolone. O'moso'mo nasahili' gohi vauve elo o-ledeline' aka nene do soto' oloseize. Lihime nene daakovo' ogo minuke'zo lolobe.

<sup>2</sup> Mo keke' ne'mine ma lamolosune. Laza nene hilunive gelo mino hilave nete inite' hamoku-mukisi upuho' isa'mani' ne'mino upuho' ogo lihime gohi damolonido' mine molo nonive nete nene lihime daa' monovo nene gohi do oto ogo molo minelonido' nene mo keke' nomive.

<sup>3</sup> Ido' Kilisitoda gi'mizo minelone lo noso hulunive laza muki' ne'mino noso huluningu' nene ezesi maka' lohoto' zalo' hilune' gilivo none' nenako nemu' nene lingine gilamahe.

<sup>4</sup> Ne'mino neine' nenako nemu' nene laza noso huluningu' nene ezesi maka' helosa ezesi maka' gonoso galesela vo minune' gele neive. Ido' noso huluningu' ne'mine ine' nene Kilisito'ni nene meleho O'moso'mo amuzo've atoli'mine ogo minine' nene do soto' ogo hilinguti' do ote-davo neine' ne'mino lazasi nene a'mine'mine ogo ezesi maka' otosa minevo' alevote nene gosoho' lolo' ogavo igi mili minilizave losa ne'mine ine' ve.

<sup>5</sup> Ee, ezela gi'mizo mino ei' hilidi'mine ogo lazasi maka' hilune' giline' nenako nemu' nene aza hilinguti' otidi'mine ogo lazasi nene ha ote none' gilivosa minelesune.

<sup>6</sup> Laza ti' lo gele none: Lihime monovo goloso ne'mo okodela gono daa' ine' nene osu' lavo laza lihime monovolo' gohi gelekele' ogo minamoloningumu' nene lemeni dameni litehe nene Kilisito'nisi lohoto' zalo' bili nizani' ma neive.

<sup>7</sup> Ido' ne'mine noluvoni' nene nemu' noluye: Ve'inesi mini lihime monovolo' gelekele' igi mini hilangu' nene a'mine monovosi huko vavosa hilave nene lihime monovo'mi gelekele' ve gohi ma minami haza minaa' nave.

**8** Laza nene Kilisitolesi maka' hilune' ma ne-nako laza nene ezesi maka' minevo' alevo' ogo minelesune lo mo gele mu'musi' gehepeve o none.

**9** Ido' ne'mine lo gele mu'musi' o none' nene Kilisito' hilinguti' otine' nene aza helaali'mi gesi minguti' nene mudise lemo heta ogani' nenako gohi helamoloseive lo gele minosa nene laza gele mu'musi' o none.

**10** Ido' hilime' nene lihime monovoli'mi amuzo nene mudise do nohulosa hilime' ve. Ido' gohi minevo' alevo' neine' nene O'moso'mine nene minevo' alevo' o do neive.

**11** Ido' lingine lengikumu' nesi nene ti' li gili minilo: Laza nene mo hilune' gilivo mino lihime nene gohi ma damolone. Ido' minevo' alevo' ogo minelone' nene mo Izesu' Kilisitoda gi'mizo mino O'moso'mine nene minevo' alevo' o do minelesune.

**12** Nemu' nene okodine heleline' akalo' mine molo neine' ne'mo nene lanite' gelo dalosa giline' goloso nite' nene mo di minilizave lo lihime monovo ne'mo nene do eita ogo do gelekele' olengedalize.

**13** Lingine okodidoti' gizedine adine ne'mine nehe nanitetine nolihe inite' hamokisi nene goloso nite' dalive li lihime monovoli'mi gono daa' inite' ne'mine nene lolo' i-damilo. Asi hiluninguti' nene otosa gosoho' lemeni damenilo' minevo' alevo' ogo none' nenako nemu' nene laza okodelati' gizede ade nevo'mine nehe ido' nanitete nolihe neve nene O'moso'mine emekunivo ei' gono daa' inel' inite've ne'mine lolo' ogavo monovo lisihe' laminekovo' ilive lii okodine muki' nene O'moso imilo.

<sup>14</sup> Ee, lingine nene Mose' lou' gamazi'mi gesi mingu' nene minami O'moso'mi nasahilili'mi gesi mingu' imi nizani' nenako nemu' lengi' nene lihime monovoli'mo eita do gelekele' o-lengedelido' minamave.

*Lihime Monovoli'mi Gelekele' Ve Minaatotikisi  
Ido' Monovo Lisiheli'mi Gelekele' Ve Minaatotikisi  
Nene Gihile've Ato Ato' Soto Oga' Neive Lo Paulo'  
Line' Gamazi*

<sup>15</sup> Ne'mino neine' nenako nadolone. Laza nene lou' gamazi'mi gesi mingu' minamo O'moso'mi nasahilili'mi gesi mingu' none' nenako lou' gamazi nene avuto' ogo ha gopo lihime daakovo' olobe. O'ove. Mo keke' ne'mine amolosune.

<sup>16</sup> Lingine ve mali'mi gelekele' ve lolo' ogo ei' gamazi've gele dalone li vi gi'mizi eito' gelekele' i-di'mi vi minilizani' ne'mo nene mo ei' gelekele' ve gehepeve nene nizave. Ido' lihime monovolo' gelekele' igi minilizani' ne'mi gihile nene helaa' nene do soto' o-lengedelesive. Ido' O'mosolo' gelekele' igi minilizani' ne'mi gihile nene O'moso'mo evene' lisihe' ve lolengedelesive. Ne'mino neingumu' nene lingine gilamani' nehe. Mo gili nilisave.

<sup>17</sup> Ne neiha lingine gomu' nene lihime monovoli'mi gelekele' ve minani'za Kilisito' gonou' velite apizi lingimi di gelekele' i-lingidani' gamazi'mi monovolo' lutine milisa e'metani' nenako nemu' nene O'mosomu' tangezo' ve lolone.

<sup>18</sup> Ee, lingine nene lihime monovolo' gelekele' igi minanguti' nene O'moso'mo do kuluhize-

lengedavo monovo lisihe' lamineli'mi gelekele'  
ve lili' ikeve.

<sup>19</sup> Ne'mine noluvoni' nene lingine nene haza  
evene' leli' ne'mine mini naza gamazi gihilelo'  
e'meto ma loloni' nene lingine a'mine'mi  
monovo gillilizado' lisihe' amani' nenako nemu'  
nene ne'mine amo ha eveneliti gamazilo' do  
molo ne'mine noluve. Ido' lingine gomu'  
nene okodido' gizedine adine ne'mine initetine  
muki' nene lou' avuto' igi lutine do goloso og'a'  
monovolo' di gelekele' i-ngidisa lou' avuto' iga'  
ave gehepeve lili' ani' ma'mine igi O'moso'mi  
evenele gehepeve minelonido' do lisihe' oka'  
oka' okunivo lute lisihe' lamine' gehepeve ilive  
li monovo lisiheto' nene a'mine okodine nene di  
gelekele' i-dilizave.

<sup>20</sup> Ne'mine ilizave luvoni' nene nanitekumu'  
ve. Lingine gomu' nene lihime monovoli'mi  
gelekele' ve mini monovo lisiheto' nene gelekele'  
isa'mani'za

<sup>21</sup> ne'mine adoti' nene gihile've nanite' soto'  
oga' ine' neve. A'mine lingine ne'mine iga' adoti'  
idise longovozo hilaa' nani' inite' ne'mo nene mo  
helaa' nene do soto' neive.

<sup>22</sup> Ne'mine og'a' neine'za idise lingine lihime  
monovolo' gelekele' og'a' aka nene mudise huli  
O'mosolo' gelekele' igi minadoti' nene gihile've  
nene lutine lisihe' o'mo vo osu' lavosa ne'mo  
nene mo minevo' minevo' minaa' lengemeni  
dameni dalisave.

<sup>23</sup> Ee, lihime monovoli'mo nene meni've meni  
hizaa' neine' nene mudise helaa' monovo  
ne neiha Guvetesi ve Izusu' Kilisitoda vo  
gi'mizekunivo O'moso'mo haza gidini lehize-

ledaa' neine' inite' nene minevo' minevo' minaa'  
lemeni dameni ne neive.

## 7

*Paulo' Aza Vene' Vemoho' Minaa' Monovolo'  
Lo Molo Kilisitokisi Hilunidot'i Nene Louto'  
Gelekele' Ogo Minune' Monovo Nene Mo Osu'  
Lave Line' Gamazi*

<sup>1</sup> Neze zuhokizo, lingine louli'mi monovo gili minavemu' nene noluvoni' nenako nemu' nene evene' laza louto' gelekele' olone' nene vetesi none' gameneukovo' nene gelekele' olosune lisa gili nilisave.

<sup>2</sup> Nemu' nene naza gamazi ma ti' lo lo molo noluve: Vene' di minani' vene' neve nene ve malo' vamoloseive lo minine' lou' gamazi ne'mo nene vanaho velesi ha mineline' gamenelokovo' nene analo' do minaa' neine'za vanaho ma heleine' nene vanahidokovo' minelive lo minine' lou' ne'mo nene kuluhize-davo haza mineleseive.

<sup>3</sup> Ido' nemu' nene vanaho velesi ha neivo ve gohi malo' viline' nene vene' vemoho' bizivo' minaakumu' minine' lou' ma nene avuto' ogal' ine' vene' ve li-dilisave. Ne'mine li-dilisaha vanaho helavosa ve gohi malo' vamilive lo minine' lou' ma'mo nene kuluhize-dine' nenako nemu' nene ve gohi malo' viline' nene a'mine lou' ma avuto' amoloseive.

<sup>4</sup> Nemu' nene neze zuhokizo, a'mine'mine igi linginesi nene Kilisitolesi hamo' lili' igi mini maka' hilikevo gomu' vadibo ne'mine minive ado' lou' gamazi ne'mo nene gohi adido' do minamivo minikeve. Ido' ne'mine ani' nene ve gohi malo' vi gi'mizilizangumu' nene ne'mine ani' ve. Ee, O'mosola gihile di soto' ilizangumu' hilinguti'

otive Izesu'ni eita nene vi gi'mizilizangumu'  
nene ne'mine ani' ve.

<sup>5</sup> Laza lemeni dameni litehelo' e'meto minune'  
gamenela nene laza lihime monovomu' lanite'  
gelaa' une' monovo nene lou' ne'mo do ote-davo  
okode mukita gono davo a'mido' e'metunidoti'  
gihile've nene helaa' akalo' mine molo minune'  
ve.

<sup>6</sup> Ne'mine une'za Kilisitolesi maka' hilune'  
ne'mo nene louli'mo adelo' do minine' nene idise  
kuluhize-ledavo laza a'mine litehe molo vine'  
lou' gamazi gizani' malo' nene gelekele' amo  
O'moso'mi Sikalahuli'mo lemeni dameni gosoho'  
do soto' o-lidido' nene gelekele' ogo gono daa'  
noune.

*Lou' Gamazi'mo Lihime Monovo Do Soto' O-  
ledavosa Lihime Daa' Noune' Nemu' Paulo' Line'  
Gamazi*

<sup>7</sup> Nemu' nene laza nadive lolone. Lou' gamazi  
nene inite' goloso lihime ne'mine neive lolobe.  
Mo keke' ne'mine neive lamolosune'za lou' nene  
ma minamidiniko naza lihime monovo nene mo  
ningamuvodine. Ee, lou' ne'mo mumuzo' amozo  
lamidiniko naza mumuzo' oga' monovo nene ma  
ningo gelamuvodine.

<sup>8</sup> A'mine lou' gamazi ne'mo nene aka velo  
do upuho' o-davo lihime monovo ne'mo nene  
mumuzo' oga' monovo muki' nene vauve elo  
lu'neu' do soto' o-nidine' ve. Ee, lou' nene ma  
minamidiniko lihime monovo ne'mo nene ogo  
molo monaa' initekisi ma amo hilive ne'mino  
haza minidinako nemu' nene noluve.

<sup>9</sup> Gomu' lou' ne'mo nenita olihe amivosä naza  
nene ha gopo minevo' alevo' ogo ve'nesi min-  
uvoni'za O'moso'mi lou' gamazi ogo hetelidoti'

nene lihime monovo ne'mo nene hiline' gelavo lu'neu' mininguti' nene gilelo otavosa

<sup>10</sup> naza ma nene mo hiluvoni' gelo minekuve. Ne'mine ogo mino naza giluvoni' nene O'moso'mi lou' gamazi ne'mo minevo' minevo' oloni' akalo' nene nele'mize molalosa minine'za asi helaa' akalo' nele'mize molaave lo giluvoni' ve.

<sup>11</sup> Ido' ne'mine noluvoni' nene nemu' noluve: A'mine lou' gamazi ne'mo nene aka velo lihime nene do upuho' o-davo lihime monovo ne'mo nene go'ne izavo lou' nene avuto' okuvosa ne'mo nene nebele helave.

<sup>12</sup> Nemu' nene O'moso'mi lou' gamazi nene mo lihime'vesi nomine' lamine' gehepeve neivo ido' gamazi hamo' hamo' a'mingu' nizani' nesi nene lihime'vesi nomine' mino mo lisihe' laminekovo' ne neive.

<sup>13</sup> Nemu' nene naza hiluvoni' ma nene a'mine init'e' lamine' gehepeve ne'mo nene nebelavosa hiluvoni' nehe. O'ove. Ne'mo nomine. Lihime monovo neve nene init'e' goloso minine' nene mo soto' ogo minelingumu' nene a'mine lihime monovo ne'mo gono do a'mine init'e' lamine' lou' gamazi nedunu' nene nemengu' molavo ne'mo nene lihime dosa hiluvoni' gelavo nouve. Ido' ne'mino neine' nene lou' ne'mo nene lelebizavo lihime monovo atoli'mine ogo init'e' goloso gehepeve minine' nene ningeloningumu' nene ne'mino neive.

<sup>14</sup> Ee, laza ti' lo gele none: O'moso'mi lou' gamazi neu' nene O'moso'mi Sikalahuli'mi emeni damenisi neive. Ne neiha nen'i nene haza eveneliti lemeni damenisi mino lihime monovo'mi gelekele' ve ne'mine ne nouve.

<sup>15</sup> Ido' ne'mine noluvoni' nene nemu' noluve: Naza nene olosa gelamuvoni' inite' monovo goloso nene ogo molo ogo mino naza gosele' gehepeve nebelaa' neine' inite' nene ha oga' nouve. Ne'mine oga' nouvoni' nene nanimu' nouhe nemu' nene mo gelesi amuve.

<sup>16</sup> Ido' naza nene lou' avuto' ogo olosa gelamuvoni' inite' goloso ma oloni' nene ha oloha olosa gelamuvoni' ne'mo nene a'mine nene amaa' inite' ve lo giluvoni' nene do soto' oloseive. Ido' lou' ne'mosi nene a'mine inite' amaa' inite' ve lo neine' nenako naza giluvoni' nesi nene lou' ne'mo lido' vo milise' ogavo ne'mo naza lou' nene mo lamine' neive lo giluvoni' nene do soto' oloseive.

<sup>17</sup> Ne'mino neine' nenako naza inite' goloso oloni' nene neni' gehepeve olovoba asi neni' lu'neu' minine' lihime monovo ne'mo nene oloseive.

<sup>18</sup> Naza lamineto' noluve. Neniku' nene ado' nemeni dameni litehesi nouvongu' neve nene monovo lamine' ma minamide lo gele nouve. Nanitekumu' ve, Naza nene monovo lamineto' e'metelesa ha gelelesuha e'metaa' nene mo ngelo ma amulosuve.

<sup>19</sup> Ne'mine noluvoni' nene nemu' noluve: Inite' lamine' olosa gelaa' nouvoni' ma nene mo osa'muve. Asi monovo goloso olosa ma gelesa'muvoni' ma nene ha o'mo vo minaa' nouve.

<sup>20</sup> Ido' naza nene olosa gelamuvoni' inite' ma oloni' nene neni' gehepeve olovoba asi neni' lu'neu' minine' lihime monovo ne'mo nene oloseive.

<sup>21</sup> Nemu' nene monovo nenita ne'mino ma

neine' nene mo ningekuve: Naza nene monovo laminekovo' ogo molo minelove lo nogiluvo a'mido' nene goloso monovo neve nene nenita mo omo minaa' neive.

<sup>22</sup> Ee, neni' lu'neu' gehepeve vomine O'moso'mi lou' gamazimu' nene lanite' gelaa' nouha

<sup>23</sup> oko'ne mukita nene ato' monovosi minaa' neivosa nene mo ningekuve. A'mine monovo ne'mo nene lu'ne ga'neu' minine' monovo lamine' nene lovo o emo mino a'nelo' nesi nene do mino a'mine oko'nela minine' lihime monovolo' nene do gelekele' o-nedaa' neive.

<sup>24</sup> Agae, minevo' alevo'ne lihitehe' o vive naza helaali'mi akalo' mine molani' oko'nesi mene nouvonguti' nene zaho do nu' izelive.

<sup>25</sup> Guvetesi ve Izesu' Kilisito' asi've nene mo do nu' izaa' neive. Nemu' nene O'mosomu' tangezo' ve lo nolo-duve.

Ido' gamazi muki' mene luvongumu' nene gelo ti' lo lolosuve: Neni' nene ga'nedunu' O'moso'mi lou' gamazilo' nene gelekele' oga' nouvon'i'za nemeni dameni litehe ne'mo nene lihime monovolo' do gelekele' o-nedaa' neive.

## 8

*Kilisito' Aza Nene Lelita Lihime Monovo  
Do Hulo-ledavo Sikalahuli'mo Lemeni Dameni  
Gosoho' Lehize-lidido' Nene E'metelonido' O None  
Lo Paulo' Line' Gamazi*

<sup>1</sup> Nemu' nene Izesu' Kilisitoda gi'mize minuniveti okodela nene lihime gohi ma nomivo O'moso'mo lihime lemelido' minamune.

<sup>2</sup> Nene nanitekumu' ve. Naza Izesu' Kilisitoda gi'mizosa minevo' minevo' minaa' do soto' o-ledaa' ive O'moso'mi Sikalahuli'mi anau' ogo nouvoni' ne'mo nene helaato' lele'mize molaa' neine' monovo lihime daali'mi anau' minuvonguti' nene mo kuluhize-nedave.

<sup>3</sup> Ee, evene' leli' lemeni dameni nene amuzo molamine' nenako ne'mo nene lou' gamazilo' ngelo e'metamolone' ogavo lou' gamazi ne'mo lihime'mi anau' minuninguti' nene ngelo ma kuluhize-ledamine' ve. Ne neiha lou' gamazi ne'mo ngelo mo lolo' amine' inite' nene O'moso'mo nene mo ha ine' ve. A'mine inite' ine' nene ei' gipele nene leli' lihime daa' univeti okode ne'minesi nene leli' lihimete apase-ledelingumu' ve lo imiseline' ve. Ne'mine ogavosa leli' lihimete muki' nene a'mine oko'no hamoto' nene dizavo O'moso'mo lihime imine' ve.

<sup>4</sup> Ido' ne'mine ine' nene lemeni dameni litehe'mo lido' e'metamosa asi O'moso'mi Sikalahu' ne'mo lido' e'meto ogo molo oga' nounive nene louli'mo lidi'mine igi evene' lisihe' lamine' minilizangumu' ve losa ne'mine ine' ve.

<sup>5</sup> Ee, evene' ma ingine ngemeni dameni litehelo' e'metaa' ave nene ngemeni dameni liteheli'mi initekumukovo' gili minaa' nani'za Sikalahuli'mo lido' e'metaa' nave ingine nene a'mine Sikalahu' ne'mo giline' initekumukovo' nene gili minaa' nave.

<sup>6</sup> Lemeni dameni litehe'mo gilido' e'metaa' ne'mo nene helo vo tolovo olonido' lele'mize molaa' neine'za Sikalahuli'mo gilido' e'metaa' ne'mo nene minevo' minevo' ogo mino hongu lovo' minelonido' lele'mize molaa' neive.

**7** A'mine lemeni dameni liteheli'mo gilido' e'metaa' ne'mo nene O'moso'mi lou' gamazi'mo lido' nene gele damo mino gele daline' amuzo'vesi nomivo mo keke' ngelo gele damoloseinako ne'mo nene O'moso biluva' o-daa' do soto' oga' neive.

**8** Ee, ngemeni dameni liteheli'mi gelekele' ve minave nete nene O'moso'mo ninge lamine' dagine' inite' hamokisi nene mo keke' ngeli ma amilisave.

**9** Ne neiha lengi' lutingu' O'moso'mi Sikalahu' nene ma minevo' dovo' ogo noline' nene lingine lengemeni dameni litehe'mi gelekele' ve minami asi Sikalahu' ne'mi gelekele' ve nene nizave. Ido' ve ma ingine Kilisito' Sikalahu've di minamave nene Kilisito' zuho minisa'mave.

**10** Ee, okodine nene lihime monovoli'mo mo helelido' o neine'za evene' lisihe' lili' igi minani' ne'mo lutine nene vele gizo neive.

**11** Izesu' hilinguti' do ote-dive'mi Sikalahu' ne'mo lutingu' mo minevo' dovo' ogo noline' nene a'mine Sikalahu' ne'mo lengi' lutingu' minevo' dovo' ogo neingumu' nene Kilisito' hilinguti' do ote-dive aza helelido' o neine' okodine nesi nene gohi ha do vele gizeleseive.

**12** Nemu' nene neze zuhokizo, a'mido' nene golo hizo inite' ma olonido' o neine'za a'mine inite' nene lemeni dameni litehe neve eito' golo hizelonido' nene nomive. Ee, a'mine lemeni dameni litehe ne'mo gilido' nene e'meto ogo molo olonido' nene nomive.

**13** Nene nanitekumu' ve. Lingine lengemeni dameni litehe'mo gilido' e'meti minilizani' nene mo mudise helaato' mini mili nizave. Ne

neiha lingine O'moso'mi Sikalahuli'mi amuzo-dunu' nene okodine'mo monovo goloso ogo molo oga' ine' nene ma bili hililizani' nene mudise minevo' minevo' ogato' mini mili nizave.

<sup>14</sup> Ee, O'moso'mi Sikalahuli'mo lido' e'metaa' ave muki' nene O'moso'mi izipahala nizani' nenako nemu' nene mudise minivi' minivi' ilisave.

<sup>15</sup> Ido' O'moso'mi izipahala nizave luvoni' nene nemu' luvoni' ve: Lingine di ti' ani' Sikalahu' ne'mo nene golise gohi gili'mi vi minilizave lo do gelekele' ve lolo' o-lingidine' nevoba asi O'moso'mi izipahala lolo' o-lingidine' ma neive. Ido' ne'mine o-lidine' ne'mo laza O'mosomu' nene meteho ve lo Ahono lo vise laa' noune.

<sup>16</sup> O'moso'mi Sikalahu' ne'mo nene leli' lute'mo lo-limine' gamazi hize ele' ogo lelikumu' nene O'moso'mi izipahala nizave lo lo soto' ogo lo-lemaa' neive.

<sup>17</sup> Ido' O'moso'mi izipahala none' nenako O'moso'mo salani molani' inite' dalonive nene none. Ee, ido' Kilisito'ni O'moso'mo do naba o-delingu' lezesi makato' do naba o-ledelingumu' nene Kilisito' mulumo alumo nite' gihine' ne'mino lazasi makato' ma geheso' nene Kilisito' salani inite've nene ezesi makato' dalosune.

*Idise Lelita Nene Geni Ha Neine'za O'moso'mi  
Sikalahu' Ne'mo Hize Ele' O-ledavo Inite' Mali'mo  
Do Goloso O-ledamivo Alinge' O'moso'mo  
Mo'mosi'Lamine'Do Soto'O-ledeleseive Lo Paulo'  
Line'Gamazi*

<sup>18</sup> Naza idise mela nene geni mulumo alumo nite' gehaa' noune' nemu' nene amuzo molo ti' lo gele nouve: Alinge' soto' o-ledeline' inite' ado' O'moso'mo do naba o-lidivo lamine' minelone'

monovo ne'mo nene inite' naba goloso neine'  
nenako a'mine genimu' nene mo gele hulolonido'  
lisuhe' o neive.

**19** Ne nanitekumu' ve. O'moso'mo do soto'  
molani' inite' muki' nete nene O'moso'mo izipa-  
hala zuho Okulumo' lemeni damenisi do soto'  
oledelingumu' nene mo soto' iliho li gizebo leke-  
seve igi nizave.

**20-21** Ne'mini a'mine gamenemu' gizebo  
igi nizani' nene a'mine gamene alido' nene  
O'moso'mo a'mine do soto' molani' inite' nene  
gihile izamilizado' ngele'mize molavo minadoti'  
nene kuluhizilizani' nenako nemu' nene gizebo  
igi nizave. Ido' O'moso'mo gihile izamilizado'  
ngele'mize molani' nene ingine ne'mine o-  
ledelive li gilangumu' nevoba asi ei' lulolo'  
do molosa gihile izamilizado' ngele'mize molani'  
ve. Ee, aza gihile izamilizado' ngele'mize molani'  
nene aza ti' lo gele mu'musi' ogo minosa nene  
ne'mine ine' ve: Alinge' vo tolovo oga' ne'mi  
anau' minilizanguti' nene kuluhizi O'moso neni'  
izipaha'ne zuho nene inite' mali'mi anaukisi  
minami atoli'mine igi hazza gehepeve nizani'  
ne'mini hazza minilisave lo gele mu'musi' ogo  
minine' ve.

**22** Ee, laza ti' lo gele none: O'moso'mo do soto'  
molani' inite' muki' nete nene vene' izipe gidilisa  
mulumo gilaa' nani' ne'mini ganakuti' mulumo  
gili le' goloso izi mini di dizi idise gamenelasi  
mene ha ne'mine igi nizave.

**23** Ido' inginevo' nene ne'mine igi nizavoba  
asi O'moso'mo lehize-ledeline' initekuti' gana'  
dalone' inite' O'moso'mi Sikalahu' mo do nonive  
lazasi nene O'moso'mo izipaha'ne ve lo do eita

ogo okode nene helo vaa' akalo' minidot'i do kuluhize-delingumu' gizebo ogo nonida mene luteu' le' izo minaa' noune.

<sup>24</sup> Ee, ne'mino hele vaa' okode nene do kuluhize-delive lo a'minem'u gele mu'musi' ogo nonivosa nene do lu' izine' ve. Ido' inite' ma soto' oloseive lo gele mu'musi' ogo gizebo minaa' noune' inite' ma soto' iline' nene laza gele mu'musi' o minelone' ma nene gohi gele mu'musi' ve lamolosune. Ido' mo ningiken'i initekumu' nene gili mu'musi' igi mini gizebo a'minem'u nene ma isa'mave.

<sup>25</sup> Ne neiha olihe ma ningamune' initekumu' gele mu'musi' ogo minelone' nene mo a'minem'u gizebo o do dizo minelesune.

<sup>26</sup> Ido' gele mu'musi' oga' noune' ne'mo hize ele' o-ledaa' neine' ne'mino O'moso'mi Sikalahu' ne'mosi nene monoku' gilizevo ogo minaa' nouninguti' nene hize ele' o-ledaa' neive. Ido' hize ele' o-ledaa' neine' nene laza O'mosola lolone' o neine' monovo nene gele guno amune' nenako nemu' nene asi've nene lelito' medelo laza gamazi vise' ogo le' izo luteu' gelaa' noune' monovo nene hize ele' o-ledo O'mosola lo-ledaa' neive.

<sup>27</sup> Ne'mine oga' neine' nene Sikalahu' ne'mo gala giline' nene luteu' minine' inite' vise' ogo do soto' oga' ive O'moso ne'mo nene mo ningolaelaa' neive. Nene nanitekumu' ve. A'mine Sikalahu' ne'mo nene O'moso'mi lulolo' do molosa O'moso'mi evenelelo' medelo lelikumu' O'mosola laa' neine' nemu' ve.

<sup>28</sup> Ido' laza ti' lo gele none: Lute O'moso eme nonive ado' ei' gala gilido' ogo ei' ve lo lele'mize molavo nonivemu' nene aza lelita soto' iliza inite'

muki' nene di laminekovo' i-lidilizado' nene do molaa' neive.

<sup>29</sup> Ido' ne'mine ine' nene aza ganakuti' ninge lamine' dani' aleve nene ei' gipele'mi emeni dameni ne'minesi lili' igi minikevo a'mine gipele nene nakunolo vai' neti uvo'nibo naba minelive losa engi' nene do kegeso ngele'mize molani' ve.

<sup>30</sup> Ee, a'mine do kegeso ngele'mize molani' aleve nene elesesi molo-ngedo do eita ine' ve. Ido' a'mine elese molo-ngedo do eita ine' aleve nene ve lisihe' ve losasi nene lo-ngidine' ve. Ido' a'mine ve lisihe' ve lo-ngidine' aleve nene eitati' monovo lamine' atoli'mine ogo minine' nesi nene lehize-ngidine' ve.

*O'moso'mo Lulo Atoli'mine Ogo Leme Neine'  
Nene Kilisito' Do Soto' Ogavo Ningunidot'i Nene  
Initi' Hamoli'mosi Mudise nGelo Ma Do Goloso  
O-ledamoloseive Lo Gele Nouve Lo Paulo' Line'  
Gamazi*

<sup>31</sup> O'moso'mo ne'mino do lu' ize neine' nenako nemu' nene ti' lo gelelesune: O'moso nene lelita molo hize ele' noo-lidine' nenako initi' malitesi nene ngeli livile' gehepeve amilisave.

<sup>32</sup> O'moso'mo ei' gipele gehepeve nene do a'manapa amo leli' mukikumu' nene lehize-lidine' ve. Ido' ne'mine ine' nenako initi' muki' nene lehize-ledamilivoba mo ezesi do lehize-ledeleseive.

<sup>33</sup> Ido' ei' ve lo do kegese-lede neivemu' nene O'moso'mo asil've ve lisihe' ve lo-lede neine' nenako zaho goni' o-ledelive. Mo ma nizamave.

<sup>34</sup> Lelikumu' hilive ado' gohi hilinguti' otive Izesu' Kilisito' O'mosolati' leme mino ana zamela mino lelito' medelo gamazite hize ele' o-ledo

neine' nenako zaho lihime lemelido' o neive. Mo ma nizamave.

<sup>35</sup> Ido' Kilisito' lulo leme neivo none' ne'mi lulouti' nene inite' mali'mosi nene gelelehe' ogo hulo heta ma o-ledamoloseive. Ado' geni inite' ne'mo nehe, lihitehe initeli'mi lulou' minelone' ne'mo nehe, goboni mala' malali'mi lulou' minelonidi'mo nehe, ga'na naba helelonidi'mo nehe, okodelo' initekumu' vise' olonidi'mo nehe, ganala daato' mine molo minelonidi'mo nehe, ido' evenelite libililisa navo luno mite' velelo' ningelonidi'mo nehe, nene ma gelelehe' ogo ma hulo heta o-ledamoloseive.

<sup>36</sup> Ido' mene noluvoni' inite' nevo'mine nene lamineto' mo soto' i-lidaa' nani' nene mono' godolou' ti' li gizado' nene vo dave:  
Guvekasi ve, geita gi'mizo minuningumu' nene gamene gamene evenelite nene libili hili hili' iga' nave.

Ne'mine nani' nene lelikumu' evene' ingine  
gilavo  
laza nene sipisipi ize ne'mine nene nizave li  
giliisa libilaal nave.

<sup>37</sup> Ne neiha a'mine mene luvoni' inite' nete nene mo keke' livile' amavo a'mine lulo leme neive Kilisito' ne'mo hize ele' o-ledaa' neine' ne'mo nene ngivile' gehepeve okune.

<sup>38-39</sup> Naza ngivile' gehepeve okune luvoni' nene nanitekumu' ve. Naza nene ti' lo gele ele'vole' o nouve; O'moso'mo lulo leme neine' Guvetesi ve Izesu' Kilisito' do soto' o-lidine' ne'mi lulou' noninguti' nene inite' mali'mosi ngelo hulo heta o-ledamoloseive. Ado' helealone' ne'mo nehe, minevo' alevo' ne'mo nehe, angelolitesi nehe, guve'inesi ve ato atolite nehe, idise soto' o-lede

neine' initelite nehe, alinge' soto' o-ledeline' initelite nehe, amuzo malehe initelite ato atolite nehe, veleta nizani' initelite nehe, gala'muda nizani' initelite nehe, ido' O'moso'mo do soto' molani' initelite gohi ma nilizani' netesi nehe, nene mo ngelo nomive.

## 9

*Paulo' Aza Eze Zuhu Zuda Ve Ingiue Nene  
Malite Gili Ele'vole' Ikevo Mukilite Gili Ele'vole'  
Amavo Angumu' Nene Paulo' Line' Gamazi*

<sup>1</sup> Kilisito' evenele nouvoni' nenako nemu' nene loloni' gamazi mene soza lamo lamineto' lolosuve. Ee, O'moso'mi Sikalahu' ne'mo nene neni' lu'ne ga'neu' hize ele' ogo neivo a'mine mene loloni' gamazi nene mo gamazi laminekovo' neive lo gele nouve.

<sup>2</sup> Naza neni' zuho Isilaele' alevemu' mulumo naba gelo muhele'ine gele'mo gele'mo vo nouve.

<sup>3</sup> Nemu' nene naza giluvo me misubou' maka' none' aleve neze zuho Isilaele' aleve hize ele' o-ngedaa' aka nene ma minidiniko engi' mukikumu' nene O'moso'mo do ngu' izelive lo Kilisitoda gi'mizo nouvonguti' nene izo huko O'moso'mo usi' ize-nedavo vo tolovo uvodine.

<sup>4</sup> A'mine aleve nene Isilaele' aleve nene nizave. Engi' a'mine zuho gehepeve nene O'moso'mo neni' izipaha'ne zuho ve lo do ti' ive nene nizave. Ido' O'moso'mi amuzo labana've ningave nesi nene nizave. Ido' O'moso'mo igi mili ilizangumu' lo huko-ngidive nesi nene nizave. Ido' eze lou' gamazi've ngimive nesi nene nizave. Ido' O'moso opo'ni lilizani' aka gihile ngelebizo ido' initelite do

lisihe' o-ngedelesa salani gamazi lo-ngidive nesi  
nene nizave.

<sup>5</sup> A'mine Zuda ve nene gomu' guve'ine gelaa'  
unive muki' Abalahamule Mosele engikuti' nene  
soto' ani' ve. Ido' Kilisito' nene O'mosolati' soto'  
ine'za helala evenetati' soto' ine' nene mo a'mine  
zuhoti vaniseuti' soto' ine' ve. Ido' Kilisito' aza  
inite' mata' mukito' Guvelesi ve minive mino mo  
O'moso ne neive. Eze opo'ni lo'mo vo mineso'  
nene mo huko vamivo opo'ni lo mine do volonive  
ne neize. Mo ne'mino miniliho.

<sup>6</sup> Ido' naza Isilaele' aleveuti' muki' nene  
Kilisito'nimu' gili ele'vole' amave noluvoni'  
nene O'moso'mo a'mine Isilaele' alevemu'  
line' gamazi nene vo haza ogave noluvoba  
asi Isilaele' aleveti vaniseuti' soto' iga' ave  
muki' nene Isilaele' aleve gehepeve nene ma  
minisa'mangumu' nene luve.

<sup>7</sup> Ido' ma nene Abalahamu' a'vopilemo' zuho  
muki' nene izipahala zuho gihile muki' nizavoba  
asi O'moso'mo Abalahamu'ni ti' lo lo-imido' nene  
neive: Isaka' a'vopilemokovo' nene gei' izipaha  
zuho gihile ve lo-ngedelone.

<sup>8</sup> Ne'mine lo-ngedelone' nene ado' evene'  
muki' soto' iga' adi'mine igi haza soto' iga' ave  
nene O'moso'mi izipahala ve lo-ngedelonivoba  
asi O'moso'mo lo huko line' gamazilo' e'meti  
soto' ave engikovo' nene O'moso'mi izipahala ve  
lo-ngedelesune.

<sup>9</sup> Ido' a'mine O'moso'mo lo huko line' gamazi  
nene ti' lo neive: Idise mene minosa gamene  
mau' nene tine' molo gohi okuvo Sala' aza nene  
gipele gedelesive.

<sup>10</sup> Ido' Abalahamu' a'vopilemokutikovo' nene

O'moso'mi zuho do kegese-ngidine' nevoba Isaka' a'vopilemo' zuhoutikisi nene ma do kegese-ngidine' ve. A'mine avoteho Isaka' aza Lepeka'ni nene lobe' izipe gede imine' ve. Ido' a'mine izipeti me'nibo nene hamo' minine'za

<sup>11-12</sup> ingine soto' igi monovo lamine' nehe monovo goloso nehe nesi nene olihe amasivoo O'moso ne'mo nene Lepeka'ni ti' lo lo-imine' ve: Gana' ve neve nene alingeni izipe'mi gelekele' ve minelive.

Ido' O'moso'mo ne'mine line' nene eze evenele do kegese-ngegedelesa evene' igi mili ilizani' monovolo' gele mino do kegese-ngedamo asi ei' ngele'mize molaa' neive'mi lulolo' do molo do kegese-ngedaa' neine' monovo've nene soto' ogo minelive losa nene ne'mine line' ve.

<sup>13</sup> Ido' neve nene mono' godolou' O'moso'mo ti' lo line' gamazilo' nene vo daave:

Naza lu'ne've nene Zakobo'ni eme nouvoni'za Esau'nimu' nene gosele' okuve.

<sup>14</sup> Ido' O'moso'mo nene ne'mine oga' neine' nenako nemu' nene nadive lolone. O'moso'mo oga' neine' nene mo lisih'e amive lolobe. O'ove. Mo keke' ne'mine ma lamolosune.

<sup>15</sup> Asi've O'moso ne'mo Mose'ni nene ti' lo lo-imine' ma ve:

Naza ise'ine ize-ngeadelove lo gelelove nene ha ise'ine ize-ngedelesuve.

Ee, muhele'ine ningو hize ele' o-ngeadelove lo gelelove nene

ha muhele'ine ningو hize ele' o-ngedelesuve.

<sup>16</sup> Nemu' nene O'moso'mo evene' mamu' nen'i ve lo do kegese-ngedeline' nene angise'ine giladoti' nehe ido' ingine igi mili minaa' naadoti' nehe

LOMA 9:17

liv

LOMA 9:20

nene ma do molo do kegese-ngedesa'mive. Asi O'moso'mo evene' muhelete ningosa isete izaa' neine' monovo've ne'movo' nene ei' ve lo do kegese-ngedelesieve.

<sup>17</sup> Ido' mene noluvoni' nene O'moso'mo Halao'ni lo-imine' gamazi mono' godolou' ti' li gizikani' gamazi malo' nene vo dave:

Gei' evene' naba do ote-giduvoni' nene  
ado' ne'minemu' do ote-giduvoni' ve: Geita nene  
amuzo inite' ma ogo do'mo leme gehepeve  
o-gedekuvo ne'mo nene nen'i amuzo'ne  
do soto' ogavo misubou' misubou' nene  
nen'i guve'ne gililizangumu' ve losa do ote-  
giduvoni' ve.

<sup>18</sup> Ne'mino neine' nemu' nene O'moso'mo ise'ine  
ize-ngedelove lo gelelive nene ise'ine ize-ngedosa  
aza gamazi've gili hulilizangumu' lu'ine do  
a'manapa o-ngedelove lo gelelive nene ha lu'ine  
do a'manapa o-ngeleseive.

*O'moso'mo Ei' Lulolo' Evene' Do Soto' Molani'  
Nenako Ei' Lulolo' Do Molo Linge Ma Ise'ine Izo  
Linge Ma Izebolo' Molave Nene Lihime nGemeline'  
Nene Mo Lisihe' O Neive Lo Paulo' Line' Gamazi*

<sup>19</sup> Ne'mino neine' nenako lingine ti' li linimilisave: O'moso'mo ne'mine oga' neine' ne-nako evene' laza nene ei' lulou' gelaa' neine' initeto' nene do peleseve' izaato' lisihe' amo a'mine gelaa' neidokovo' nene e'meto vaa' noune' nenako nemu' nene nanitekumu' goloso gelo lihime molo-ledaa' neive.

<sup>20</sup> Vekizo, lingine nene ne'mine li linimilisani'za lingine nene haz a vetesi O'moso neve nene e'menga li-imilizado' lisihe' i nizahe.

Ido' initie' ma lolo' iline' nene a'mine initeli'mo lolo' o-delivemu' nene ha ti' lo lo-delihe: Gaza nene ne'mino lolo' o-nedamilinako nanimu' ne'mino lolo' o-nedane lo ha lilihe.

<sup>21</sup> Ido' misubo somo lolo' oga' ive misubo do va'va' ogo molokidoti' nene linge ma do somo lamine' gidi nani' nene ma lolo' ogosa a'mine hamo' misubo mauti' linge ma do haza somo meni've lemo minine' nesi nene lolo' iline' nene lisuhe' amilihe. O'ove. Ei' lulolo' nene initie' laminekisi golososi nene ha lisuhe' o neivo lolo' oloseive.

<sup>22</sup> Ido' O'moso'mo a'mine'mine oga' neive. Aza nene neni' nizebolo' molani' nene ngelebizekuvo evene' nete neni' amuzo'ne nene ningi gililizave lo gele mino a'mine somo goloso ne'mine mini ei' izebolo' molaa' neine' aleve vi tolovo ilizado' do soto' ine' aleve nene gozopoti' ha ninge mate ngimikoo hongu lo minine' ve.

<sup>23</sup> Ne'mino minine' nene evene' somo lamine' ne'mine minikevo ise'ine ize-ngedelive ado' go-mukuti' ei' emeni dameni lamine' atoli'mine ogo minine' nene dalizado' do va'va' o-ngidive nete nene a'mine O'moso'mi emeni dameni lamine' tamine' vai' giki' ogo neine' nene ningilizave losa ne'mino minine' ve.

<sup>24</sup> Ei' ve lo elese molo lele'mize molave lelikumu' nene noluve. A'mine elese molo-lidive nene Zuda ve lelikutikovo' nomive. Asi heta ato' veutikisi nene ma ne'mine o-ngidine' ve.

<sup>25</sup> Ne'mine inel' nene ei' line' gamazi polohete Hosea' ti' lo gize neido' nene vo dave:

Evene' neni' zuho minamani' alevemu' nene neni' zuho ve l o ha lo-ngedelesuve.

Ee, naza lu'ne ngemesa'muvoni' alevemu' nene

lu'ne ngeme nouvoni' aleve ve lo-ngegedelesuve.

<sup>26</sup> Ido' lengi' nene nen'i evene'ne zuho nizamave  
lo lo-ngimuvoda nene  
minevo' dovo' oga' ine' O'moso nen'i izipaha'ne  
zuho ve lo-ngededelesuve.

<sup>27</sup> Ido' polohete Isaia' aza Isilaele' alevemu' nene  
ti' lo lo soto' ine' ve:  
Isilaele' aleve nene noso gahevela gepe minaa'  
neine' ne'minisa vai' goloso minilizaha  
a'minguti' nene ngomosikovo' ma lukuvo  
nalisave.

<sup>28</sup> Ne'mino evene' ngomosi' do ngu' izavo lukuvo  
nalizani' nene Guvelesi ve'mo lite' lo ei' mis-  
ubo'veu' aleveliti goni'ine gele osu' lo lihime  
ngemo osu' lilidi'mo nene ngomosikovo' ma  
lukuvo nalisave.

<sup>29</sup> Ee, Isaia' gamazi ma gomukuti' ti' lo lo soto'  
ido' nene vo dave:  
Amuzo'vesi mino  
inite' mulise ato ato' mukito' gizebo oga' neine'  
Guvelesi ve'mo nene  
Isilaele' aleve leli' nene ha mini di dizivo'  
minilizave lo  
evene' ngomosi' nene ma hulo-ledamidiniko  
laza nene Sodomi alevesi ido' Gomola alevesi osu'  
gehepeve lani' ne'mine ogo  
mo osu' gehepeve lunidine.

*Heta Ato' Ve O'moso'mo Ve Lisihe' Ve Lo-  
ngedeline' Aka Nene Mo Ningani'za Isilaele'  
Alevemu' O'moso'mo Ve Lisihe' Ve Lo-ngegedeline'  
Akamu' Nene Gosele' nGebelavo Olovo' Ani' Ve Lo  
Paulo' Gazine' Gamazi*

<sup>30</sup> Ne'mine ogo neine' nenako neloti' nene laza  
ti' lo gelelesune: Ve lisihe' lili' ilizani' akamu'

vise' amave heta ato' ve ma nete a'mine aka nene ningi ikeve. A'mine aka nene ezemu' gele ele'vole' okunivo O'moso'mo ve lisihe' ve ledaa' neine' akamu' nene noluve.

<sup>31</sup> A'mine heta ato' ve nene ne'mine ikeha O'moso'mi evenele zuho Isilaele' aleve nete nene lou' gamazilo' e'metelonidot'i nene ve lisihe' lolo' olobe li ne'mine ilizani' aka nene vise' ani'za mo keke' ma di gihile izamani' ve.

<sup>32</sup> Nanitekumu' di gihile izamave. Di gihile izamani' nene O'mosomu' gele ele'vole' ogosavo' nene do gihile izeso' o neive lamisa asi leli' gono dalonidotikovo' nene do gihile izelesune li di gihile izilisa ani' ne'mo nene mo di gihile izamani' ve. Ingine mono' godolou' evene' zodoho' izi limi ingalizani' gehenimu' gizi nizado' nene zodoho' izi limi ingani' ve.

<sup>33</sup> A'minemu' O'moso'mo line' gamazi nene ti' li gizi nizave:

Lingine gililo.

Naza Zuda veti goto' numudida Zaioni golola  
nene

evene' zodoho' izi limi pou' li ingalizani' geheni  
gehepeve nene

ma nomuluve.

Ido' ve ma ingine a'mine geheni minivelo' ma gili  
ele'vole' ilizave nene

a'mine gili ele'vole' ilizadoti' nene gihile've dami  
ngovozo hililizavoba

asi mo hilamilisave.

## 10

<sup>1</sup> Neze zuhokizo, naza Zuda vemu' nene lu'neu'  
amuzo molo gelaa' nouvoni' nene ado' ti' lo gelo

O'mosola a'minemu' laa' nouve: O'moso'mo do ngu' izeliho lo a'minemukovo' laa' nouve.

<sup>2</sup> Nene nanitekumu' ve. Engi' monovo nene mo ninge lamine' o nouve. Ingi nene gilingili igi O'mosomu' gilaa' nani'za eze e'metilizani' aka nene ninge nobe li ningi gili guni amave.

<sup>3</sup> Ido' ne'mine noluvoni' nene nemu' noluve: Ingi O'moso'mo evenekumu' evene' lisihe' ve lo-ngedaa' neine' monovomu' nene gili imami mini angise'ine di soto' ani' monovolo' di mili evene' lisihe' ilisa igi mili minaa' nani'za O'moso'mo evene' lisihe' ve lo-ngedeline' monovolo' nene gelekele' amave.

<sup>4</sup> Ne'mine iga' nani'za ezemu' gili ele'vole' igi minave nene ve lisihe' ve lo-ngedosa Kilisito' aza lou' gamazilo' e'metaatoti' evene' lisihe' lolo' oga' aka nene mo mudise hize tiline' nenako nemu' ingine nene mo ladani nave.

*Guvelesi Vela Vise Liliza Aleve Muk'i Nene Do  
nGu'I Zeleseive Lo Paulo' Line' Gamazi*

<sup>5</sup> Naza mo lamineto' noluve. Ingi ngelo amoso' inite' ilisa nani' neine' nene Mose' aza lou' e'metaatoti' evene' lisihe' lolo' ogakumu' ti' lo gizidoti' nene ha gelelesune:

Ve ma ingine a'mine lou' gamazi vaito' e'meti  
                  lamine' ma ilizani' nene a'mine ne'mine  
                  ilizadoti' nene mine lamine' igi ha minivi'  
                  minivi' igi minilisave.

<sup>6-7</sup> Ne neiha O'mosomu' gele ele'vole' ogatotikovo' nene evene' lisihe' lolo' oga' neve nene lapa nomivo ha lolo' olonido' neine' nene gamazi ma ti' lo neidoti' nene gelelesune:

Lingine a'mine nene mo amoso' nite' neive lisa  
 lutingu' ti' li gilamilo: Okulumokuko zaho  
 dizelive. Mo ma dizamilisave. Ido' home  
 galese golosou' zaho lemelize. Mo ma  
 limamilisave.

Ne'mine lilizani' nene Kilisito'ni Okulumokukoti'  
 ele'mizi limilizangumukisi ido' hilinguti' di oti-  
 di ele'mizi dizilizangumukisi lilizani' nenako ido'  
 Kilisito' aza mo Okulumokuti' lemosa hilinguti'  
 nene mo otosa neine' nenako nemu' nene amoso'  
 inite' ma nomine' nenako ne'mine li gililizado'  
 ma nomive lo neine' ma neive.

<sup>8</sup> Ne neiha a'minemu' nene gamazi ma ti' lo  
 neive:

A'mine mono' gamazi nene hota ne'mine ma  
 minamide.

Asi avito' mino

lingine ha vetinedunu' lilizado' mino lutingu'  
 gililizado' neive.

A'mine mono' gamazi nene O'mosomu' gele  
 ele'vole' ogali'mi gamazi leli' lo soto' o ngemaa'  
 noune' gamazi nene neive.

<sup>9</sup> Ado' lingine vetinedunu' nene Izesu' aza Gu-  
 vetesu ve naba ve li li soto' igi ido' lutingu'  
 nene O'moso'mo hilinguti' do ote-dine' ve li gili  
 ele'vole' ilizani' nene O'moso'mo do lungu' izele-  
 seive.

<sup>10</sup> Ee, lutedunu' a'mine gamazi gele ele'vole'  
 oso' nene O'moso'mo evene' lisihel' ve lo-ledelive.  
 Ido' vetedunu' a'minemu' lo soto soto' oso' nene  
 O'moso'mo do lu' izeleseive.

<sup>11</sup> Ido' mene noluvoni' nene mono' godolou' ti' li  
 gizi nizado' nene vo milise' ogave:

A'mine vemu' gili ele'vole' ilizave muki' nene

a'mine gili ele'vole' ilizadoti' nene gihile've dami  
ngovozo hililizavoba

asi hilamilisave.

<sup>12</sup> Ido' ingine muki' ngovozo hilamilisave noluvoni'  
nene Zuda vesi heta ato' vesi nene ato  
atoli'mine minamavo engi' sitato' gizebo oga' ive  
nene Guvelesi ve ei' hamokovo' mino hize ele'  
o-ledelive li ezela laa' nave ato ato' muki' nene  
atoli'mine ogo nasahili' o-ngedaa' neine' nenako  
nemu' nene noluve.

<sup>13</sup> Ee, evene' muki' ingine Guvelesi ve'mi gulive  
igi ezela lilizave ato ato' muki' nene do ngu'  
izeleseive li mono' godolou' gizi nizani' ve.

<sup>14</sup> Ne'mino neine'za ingine Kilisito'nimu' gili  
ele'vole' amani' nenako nadiisa ei' gulive igi  
ezela lilizave. Mo ne'mine ma amilisave. Ido'  
ezemu' li-ngimavo ma gilamani' nenako haza  
nene nadiisa gili ele'vole' ilizave. Mo ngeli  
ne'mine ma amilisave.

<sup>15</sup> Ido' O'moso'mo eze gamazi li soto' igi  
li-ngimilizave ma ngimiselamiline' nene nadiisa  
vi li soto' igi li-ngimilizave. Mo ne'mine  
ma amilisave. Gamazi lamine' li-ngimilizave  
ngimiselingumu' nene mono' godolou' ti' li gizi  
nizave:

Gamazi lamine' li soto' igi li-limilizave ani' nene  
mo ede vine' initel' ikeve lo lolize izekune.  
Gamazi lamine' li soto' ilizave nene mo ne'mino  
ngimiselavo igi li soto soto' ani'za

<sup>16</sup> Isilaele' aleve muki' gidini nete a'mine gamazi  
lamineto' nene gili damani' ve. Ne'mine ani'  
nene mono' godolou' polohete Isaia' gamazi ma  
ti' lo lido' nene vo dani' ve:

Guvekasi ve, laza lo-ngimune' gamazilo' nene

mo ma gili ele'vole' amave.

<sup>17</sup> Nemu' nene laza ti' lo gele none: Kilisito'nimu' gele ele'vole' olone' nene gamazi lamine' gelosavo' nene gele ele'vole' olosune. Ido' gamazi lamine' gele lone' nene Kilisito' gamazi've nelotikovo' nene gamazi lamine' gelesune.

<sup>18</sup> Ne'mino neine'za naza ti' lo noluve: Ingue nene a'mine gamazi mene gilamavoba asi mo gili nizave. Mono' godolou' ti' li gizi nizani' malo' vo dave:

Ve'ninguti' gamazi ne'mo nene mo misubou' misubou' vo osu' lave.

Ee, gamazi'ine nene evene' minani' misubo ne'mo vo sididasi nene  
buu lo vine' ma neive.

<sup>19</sup> Ido' naza gohi ti' lo noluve: Isilaele' aleve ingue gili vevesamilizado' minavoba asi gili vevesilizado' minani' ve. A'mine nemu' nene gana' Mose' O'moso'mo line' gamazi ti' lo gizine' ve:

Evene' ma nen'i zuho nizave li gilamave haza ve engikuti' nene

ma do nenita okuvo

lingine Isilaele' aleve a'minem'u' nene lavodine nalisave.

Ee, ga'ine gili vevesamave nene ma do nenita okuvo

nemu' nene mo lingizebolo' molaloseive.

<sup>20</sup> Ido' Isaia' aza O'moso'mo line' gamazi gohi ma lovo' kiselevo' ogo ti' lo gizine' ve:

Nenikumu' vise' isa'mave nete nene nenikumu' mo ningi gilikeve.

Ee, nen'i monovo'nemu' gililisa longo'  
isa'mavela nene

neni' monovo'ne do soto' ogo ngelebizekuvo  
mo ningikeve.

**21** Ne neiha Isilaele' alevemu' aza ti' lo line' ve:  
Naza nene haz a minamo  
gamene gamene a'ne do patelo nenita alo alo lo-  
ngede'mo vovo' minaa' nouvoni'za  
ingine nene gamazi'ne gili huli e'menga laa' ave  
mini  
mo gilisa'mave.

## 11

*Isilaele' Aleve Engikuti' Muki' Gidini Nene  
Kilisito'nimu' Gili Ele'vole' Amani'za O'moso'mo  
A'mine Isilaele' Aleve Muki' Mudise Vasa Ize-  
ngedamo Engikuti' Linge nGomo Nene Do Kegese-  
ngidine' Ve Lo Paulo' Line' Gamazi*

<sup>1</sup> Isilaele' aleve ingine ne'mine igi minani' ne-  
nako naza ti' lo gelo longo' nouve: O'moso'mo  
a'mine evenele zuho mo mudise vasa ize-ngede  
neine' nolihe. O'ove. Mo keke' ne'mine amil-  
ihe losa gele nouve. Naza mudise vasa ize-  
ngedamive noluvoni' nene nenikisi a'mine Isi-  
laele' aleveuti' nouvoni' nenako nemu' noluve.  
Ee, naza Abalahamu' a'vo mino Zakobo' gipele  
Benizamini' a'vopilemo' zuhouti' gehepeve ne  
nouve.

<sup>2</sup> O'moso'mo gomukuti' ninge lamine' do  
eze zuho lolo' o-ngede neine' aleve've nene  
mo keke' mudise vasa ize-ngedamive. O'ove.  
Ido' nemu' nene lingine Elia' gamazi've mono'  
godolou' neine' ma nene gilamani' nehe. Isilaele'  
alevemu' nene ti' lo O'mosola lipoti molani' ve:

<sup>3</sup> Guvekasi ve, gei' vekauti' gamazi laa' ave  
polohete vai' nene ngibili gese' igi gopo'ni lo

inite' molo-gedaa' une' holomo muki' nesi neve  
nene izi ngu'vosi hulikevo geita mili ge'metaa'  
ave nene gohi masi nizamavo nenikovo' nene  
lumo novo nenikisi nibililisamu' nene vise' i'mi  
nimonave.

<sup>4</sup> Ne'mine line'za a'mido' O'moso'mo lo-imine'  
gamazi mene gililo:

O'ove. Gaza nene geikovo' gehepeve nene lumo  
minamane. Vemoho' seveni tauseni (7,000)  
ne'mine nene soza o'moso inite' Baali'ni  
nene gubi' izi imi opo'ni lisa'mave neni'  
evene'ne gehepeve nene nenikumu' ve lo  
lumo ha hulo-ngede nouve.

<sup>5</sup> Ne'mine line' nenako a'mine'mine ogo idisesi  
nene evene' ngomosi' nene haza gidini inele  
ogosa ei' ve lo do kegese-ngedavo nizave.

<sup>6</sup> Ei' ve lo do kegese-ngidine' nene inele oga'  
ne'mine ogo haza gidini do kegese-ngidine' ne-  
nako ne'mine o-ngidine' nene gono ma dikevosa  
ne'mine o-ngidine' nene nomive. Asi gono ma  
dikevosa ne'mine o-ngidine' neidiniko inele haza  
gidini ogo do eita o-ngidine' ma nene inele  
ne'mine ine' gelamidine.

<sup>7</sup> Nemu' nene laza nadive lolone. Ti' lo lolosune:  
Isilaele' aleve O'mosolati' vise' ani' inite'  
nene ado' ve lisihe' ve lo-ngedeline' mukilite ma  
damavo O'moso'mo do kegese-ngidive netevo'  
nene dikevosa linge ma nene a'manapa igisa  
damani' ve.

<sup>8</sup> Ne'mino soto' ine' inite' nene mono' godolou' ti'  
li gizado' nene soto' neive:

O'moso'mo lu'ine nene do negi hize-ngedavo  
ve'inedunu' nene inite' ma ningami  
ga'inedunu' nene gamazi ma gilami mini

idisesi ne'minivo' igi nizave.

<sup>9</sup> Ido' Davidi' nene ti' lo line' ve:  
Ido' lanite' gilani' inite' ne'mo nene  
gelevuso ne'mine gehepeve lolo' ogo ngebelavosa  
lihime dalizaho.

<sup>10</sup> Ee, ve'ine nene do gopo o-ngedavo initekisi ma  
ningamilizaho.  
Ido' geni initeli'mo gamene gamene mehe'ine  
nene  
do hilingize-ngede miniliho.

*Isilaele' Aleve Inging Aka Laminetoti' Zovo' Izi  
Vani' Ne'mo Nene O'moso'mo Heta Ato' Ve Do  
nGu' Izeline' Aka Nene Velave Lo Paulo' Line'  
Gamazi*

<sup>11</sup> Nem'u' nene naza ti' lo gohi longo' nouve:  
Isilaele' aleve ingine ladani igisa mo mudise limi  
pou' li ingani' nehe. O'ove. Mo keke' ne'mine  
amani'za asi ingine aka laminetoti' nene zovo'  
izi vani' ne'mo nene O'moso'mo heta ato' ve do  
ngu' izeline' aka nene velave. Ido' ne'mine aka  
vele-ngidine' nene a'mine Zuda ve ningi lezesi  
ne'mine o-ledeliho lilizave losa vele-ngidine' ve.

<sup>12</sup> Ido' ingine aka laminetoti' nene zovo' izi vi  
gopo ani' ne'mo nene O'moso'mo heta ato' ve vai'  
nene do lamine' o-ngedelido' ngele'mize molo  
inite' lamine' gehepeve do soto' ine' nenako Zuda  
ve ingine nene alinge' mudise aka lamineto' tine'  
mili alizani' ne'mo nene mo ivile' ivosa inite'  
amine' goloso do soto' oloseive.

<sup>13</sup> Ido' heta ato' ve lengikumu' nene ti' lo  
noluve: Naza nene heta ato' ve lengi' aposolo  
nouvoni' nenako nemu' nene naza heta ato' ye  
lengita gono daa' nouvongumu' nene do naba  
oga' nouve.

**14** Ido' lengita ne'mino aposolo gono daa' nouvongumu' do naba nouvoni' nene neze zuho Isilaele' aleve nene ningi ingine heta ato' ve ne'mine gono do-ngidine' nene leli' do-ledelinako li minikevo engikuti' linge ma nene O'moso'mo do ngu' izeline' akalo' ngele'mize molaloho lo a'mine gono'nemu' nene do naba oga' nouve.

**15** Ido' engi' nene O'moso'mo do ngu' izeline' akalo' ngele'mize molaloho lo noluvoni' nene ti' lo gelosa noluve: O'moso'mo vasa ize-ngidine' ne'mo nene misubou' aleve linge lovo i imi minanguti' nene gohi ei' O'mososi do hamo' o-ngidine' nenako nemu' nene a'mine Isilaele' aleve nene gohi do gatulo o-ngedeline' ne'mo nene atoli'mine ogo inite' lamine' goloso do soto' o-ledavo mo helaa' ne'mine ogo noninguti' nene gohi oto minevo' dovo' ogo none' geleleseive.

**16** Ido' Isilaele' alevemu' nene aneza gamazi ti' lo lo-lengemelesuve: Beleti lolo' ogosa gomu' nene a'midot'i' linge ngomo ma do O'moso emekunivo O'moso'mi inite' lolo' iline' nene a'mine beleti linge naba nesi nene O'moso'mi inite' lolo' oloseive. Ido' zali'mi luhive ne'mo O'moso'mi inite' ma mineline' nene a'mine zali'mi a'nava nesi nene O'moso'mi inite' mineleseive.

**17** Ido' Isilaele' aleve ingine O'moso'mi oliva za ne'mine minani' nene O'moso'mo a'mine za'mi a'nava linge nene huko hulosa oliva za hadeneloti' a'nava ma nene do ei' oliva za'velo' nene do gi'mizine' nenako Isilaele' aleveti avo'ningidati' soto' ine' mono' lamine' nene lingine heta ato' vesi nene makato' di nizaze.

**18** Lingine nene O'moso'mo oliva za'veloti' a'nava've linge ma huko huline' mamu' nene ningedo' hangedoka li-ngidi lengi' okodine di dizamilo. Lingine nete nene a'mine zali'mi luhive've nene di ngi li-ngidisa'mave. Asi ei' a'mine za ne'mi luhive nete lengi' nene di ngi li-lingidaa' naani' nenaze. Okodine nene di dizamilo.

**19** Ido' a'minemu' nene lingine ti' li lili save: Ido' nadiive. Leli' nene O'moso'mi oliva za'velo' nene do gi'mize-ledelesa ei' a'nava've nene huko hulo do gi'mize-ledave.

**20-21** Ehe, mo lamineto' nilani'za engi' huko hulo-ngidine' nene ingine ezemu' gili ele'vole' amavosa huko hulo-ngidine' ve. Ido' lingine ei' za'velo' do gi'mize-lengedavo nizani' nene lengi' gili ele'vole' i minangumu' nene ei' za'velo' nene do gi'mize-lengedavosa nizave. Nemu' nene lengikumu' gilavo dizalize. O'moso'mo a'mine za've'mi a'nava've gehepeve nene ise'ine izamine' nenako lengikisi nene isetine izamoloseize. Golisesi nene ha gili minilizani' o neive.

**22** Ido' O'moso'mo ne'mine oga' neidot'i nene helala nasahili' lamine' oga' neine' nene ningido' helala amuzo molo lihime ngemaa' neine' nene ningido gelelesune. Ee, monokuti' limi ingave nene amuzo molo lihime ngemosa lengi' nene nasahili' o-lengedo neive. Ido' aza nasahili' o-lengedelido' lisihe' i minilizangumu' nene mo nasahili' o-lengedelesiha ne'mine ma ami minilizani' nene linginesi za'veloti' nene huko hulalize. Ningiisa minilo.

**23** Ido' a'mine za'veloti' a'nava huko huline'

ne'minisa minani' Isilaele' aleve ingine gili ele'vole' ami minadoti' nene huli gili ele'vole' ma ilizani' nene O'moso'mo gohi za'vela do gi'mize-ngedaa' amuzo nene ha do neinako gohi ha do gi'mize-ngeleseive.

<sup>24</sup> Ido' ne'mino gohi do gi'mize-ngedeline' amuzo do neine' nene nadosa ningō gelelone. Aza nene amoso' inite' gehepeve ogo heta ato' ve lingine nene oliva za hadeneloti' a'navā ne'mine minave nene ei' oliva za've lameku' nene do gi'mize-lingidine' nenako nemu' nene ei' za'veloti' gehepeve minani' aleve Zuda ve nene ha lapa nomine' inite' ogo gohi a'mine za'velo' nene ha do gi'mize-ngeleseive lo ningō gelelesune.

*O'moso'mo Isilaele' Aleve A'manapa Igi Minanguti' Gohi Do Eita Ogo Do nGu'Izeline' Nenako Ne'minosa Evene' Ato Ato' Muki' Nene Isete Izeldeleseive Lo Paulo' Line' Gamazi*

<sup>25</sup> Neze zuhokizo, mene loloni' gamazi nene gilami minilizani' ne'mo lingine laza otohato ve nene none lisa okodine di dizi minikelizave losa suno' gamazi mene lo-lengemelouze. Gililo: Isilaele' aleve linge nene a'manapa igi Kilisito'nimu' gili ele'vole' amani'za neve nene mudise nomine. Asi heta ato' ve ingine O'moso'mo gele neine' votigilelo' O'mosola imi hilalizani'

<sup>26</sup> neloti' nene mono' godolou' ti' li gizi nizado' nene e'meto Isilaele' aleve muki' nene do ngu' izeleseive:

Isilaele' aleveti goto' numu'ine Zaioni gololoti'  
nene  
do ngu' izelive ma soto' oloseive.

Soto' ogosa aza mono' gelamaa' monovo  
 Zakobo' a'vopilemo' zuho Isilaele' alevetingu'  
     minine' nene  
 do huloloseive.

<sup>27</sup> Naza gamazi meve nene ma nolo huko-  
 ngiduve.

Engi' lihime do hulo-ngedeloni' gamene nene ma  
 gihile izo soto' oloseive.

<sup>28</sup> Izesu'nimu' gamazi lamine' nene gili hulisa  
 Isilaele' aleve nene O'moso'mi biluva've lili'  
 ani' ve. Ne'mo nene heta ato' ve lingine  
 O'moso'mo do lungu' izeline' akalo' lengele'mize  
 molave. Ne neiha ganakuti' nene O'moso'mo  
 ei' ve lo do kegese-ngidine' nenako nemu' nene  
 engi' avo'ninginemu' gele minosasi nene lulo ha  
 ngeme neive.

<sup>29</sup> Ido' lulo ha ngeme neive noluvoni' nene  
 ado' O'moso'mo evene' ma elese molo-ngedo do  
 eita ogo inite' ma ngeme noline' nene a'minemu'  
 gamazi gohi senisi ogo o've a'va losa'mine' ne-  
 nako nemu' nene luve.

<sup>30</sup> Ee, gomu' nene heta ato' ve lingine O'mosolo'  
 gelekele' ami minani'za Isilaele' aleve ingine  
 nene idise O'mosolo' gelekele' amavo ne'mo nene  
 O'moso'mo lengi' heta ato' ve nene isetine izo do  
 eita ogave.

<sup>31</sup> A'mine'mine ogo O'moso'mo lengi' isetine  
 izo do eita ine' ne'mo nene Isilaele' aleve idise  
 O'mosolo' gelekele' amave. Ido' ne'mine monovo  
 soto' ine' nene O'moso'mo engi' Isilaele' aleve  
 nene ise'ine izelingumukisi ve losa ne'mino soto'  
 ine' ve.

<sup>32</sup> Ee, O'moso'mo evene' ato ato' muki' nene  
 ise'ine izelido' lisihe' i minilizangumu' ve

lo evene' muki' nene ezelo' gelekele' amaa'  
monovo'mi gesi mingu' nene hulo-ngidine' ve.

*O'moso Nene Atoli'mine Ogo Miningumu'  
Paulo'Do Naba O-do Opo'ni Line'Gamazi*

<sup>33</sup> Aizoo, O'mosote nene atoli'mine ogo minive neive. Ado' gamazi gele neine' nene atoli'mine ogo gele mino otohato oga' neine' nesi nene voso' vamoso' vaa' neive. Ido' lo hukaa' neine' gamazi'mi monovo nene evene' malitesi ngelo lo ngolo' lo osu' lamolosune. Ido' eze gono dalosa gala gelaa' neine' nemu' nene ve malitesi ngelo gelamolosune.

<sup>34</sup> Mono' godolou' ti' li gizi nizani' nenako mo lamineto' noluve:

O'moso'mo gelaa' neine' maduno nene evene' hamolitesi ngelo ma gelamolosune.

Ido' evene' hamolitesi nene  
ogo molo iline' monovomu' ngelo ma apize emamolosune.

<sup>35</sup> Ido' evene' hamolitesi nene

O'moso'mo alinge' do tibizo lemelize lo dina' ogo inite' nene ngelo ma emamolosune.

<sup>36</sup> Nanitekumu' ve. Inite' muki' nene eitokovo' gelekele' i-dilizave losa asi'vevo' inite' muki' do soto' ogavo mo eitokovo' lehete i minaa' nave. Nemu' nene O'moso opo'ni lo minelone' nene huko vamivo ha miniliho.

## 12

*Laza Nene Okode Lute O'moso Lehize-do  
Gono've Daloningumu' Nene O'moso'mo Limine'  
Amuzo Ato Atodunu' Nene Hamo' Hamo' Amuzo  
Molo Ogo Molo Olosune Lo Paulo' Line'Gamazi*

**1** Nem'u' nene neze zuhokizo, O'moso'mo ne'mino muhelete ning'o isete izaa' neine' nenako nem'u' nene naza agae lo do upuho' o-lengedo gatine do ti' lo nolo-lingimuve: Ize ato ato' ngibili O'moso lehizi-daa' ani' ne'mine igi lingine okodine nene di kekeize li O'moso'mi monovolokovo' di milikevosa O'moso'mo lanite' gelelido' lisihe' o minivo a'mine okodine nene lehizi-dilo. Ido' lehizi-dilizani' okodine nene hele neivosa nevoba asi velesi ha minevo' dovo' neido' nesi nene lehizi-dilo. Ne'mine ilizani' neve nene mo madu'ningu' gamazi neivete iga' ilizani' o neine' inite' nenako a'mido' nene ha ilisave.

**2** Me misubou' minine' monovo danava goloso nene di otuhi minamilo. Asi O'moso'mo lutine gatine do gosoho' o-lengedavo ne'mo nene a'mine gomu' lengemeni dameni do hulosa nene do ato' o-lengedavo minilo. Ne'mine ilizani' nene O'moso'mo igi mili minilizave lo gele neine' monovo ado' monovo lamine' ei' gilido' gehepeve vo daa' neine' monovo ado' aza a'minem'u' lanite' gelelido' lisihe' o neine' monovo nene igi mili minilizani' nenako neloti' nene ei' gelaa' neine' monovo nene ningi gililisave.

**3** Ido' O'moso'mo nasahili' o-nedo nen'i mo'mosi'ne mene lehize-nidine' nenako nem'u' nene naza lingine luvoni' ne'mine ilizangumu' ve losa nene leng'i hamo hamo' nene ti' lo nolo-lingimuve: Lingine O'mosomu' gili ele'bole' ikevo amuzo lingimine' nene hamo hamo' nani amuzo lingimihe ne'mi votigile gehepevelo' di milisa lengikumu' gilavo a'mine votigile ivile' ogo dizalinaze. Lengikumu' nene gili vevesisa minilo.

**4** Lingine ne'mine ilizave lo noluvoni' nene nemu' noluve: Evene' okodelo' nene gizede ade ne'mine inite' nene ato ato' vai' goloso neivo ingine mini gono'ine daa' nani' nene ato ato' gono daa' nave.

**5** A'mine'mine ogo Kilisitoda nene evene' muki' laza oko'no hamo' ne'mine lolo' ogo ato ato' minamo ne hize ele' o-gede ge hize ele' o-nede lo minelonive nene none.

**6** Ido' O'moso'mo nasahili' o-ledo amuzo lehize-ledine' nene hamoli'minevo' lehize-ledamo ato atoli'mine lehize-lidine' ve. Nemu' nene O'moso'mo ve ma lehize-lede noline' amuzo nene O'moso'mi veleti' gamazi lo soto soto' oga' amuzo noline' nene laza mo la'lisetet gele ele'vole' o nolone' votigilelo' nene do molosa O'moso'mi veleti' gamazi nene lo soto soto' ogo lolosune.

**7** Ido' ve malite evene' ma hize ele' o-ngedaa' amuzo lehize-lede noline' nene mo ha evene' hize ele' o-ngedo minelesune. Ido' evene' inite' ma apize ngemaa' amuzo lehize-lede neine' neivo ma nene mo ha apize ngemo minelesune.

**8** Ido' evene' ga'ine do gamazi lo-ngemaa' amuzo ma lehize-lede neine' neivo ma nene ha mo ga'nine do gamazi lo-ngemaa' olosune. Ido' ve ma nene inite' ize' molo ngemaa' amuzo lehize-de nolive ne'mo nene mo inele ogo ngemeleseive. Ido' ve mali'mo nene gomu' molo ngemaa' amuzo do noline' nene a'mine gono've nene amuzo molo do mineleseive. Ido' ve ma aza nasahili' o-ngedaa' amuzo do nolive ne'mo nene nasahili' o-ngedaaku' nene olize izo minosa ne'mine ilive.

*Mono' Alevete Igi Mili Ilizani' Monovo Gihile  
Nene Do Mineloningumu' Paulo' Line' Gamazi*

<sup>9</sup> Lingine evene' lutine ngimaa' naani' monovo nene abeleni ne'mine nomivo mo lutine ngimi gehepeve igi minilo. Monovo golosomu' nene gosele' lengebelavo mehedine imivo' mini monovo lamineto' nene gi'mizi gili' li minilo.

<sup>10</sup> Hamo' zuho lili' igi nizanako nemu' nene hamo' zuholite lu'ine ne geme ge neme li minilizani' votigilelo' di mili lutine amuzo mili ge neme ne geme li minilo. Ido' evene' di naba i-ngidaa' monovomu' nene aka ge nelebize ne gelebize li minilo.

<sup>11</sup> Monoku' mini gonotine di di vi minaa' naani' nene gosele' lengebelamivo mini Guvelesi ve nene lutine gilingili ivo gelekele' i-di minilo.

<sup>12</sup> Lingine Kilisito' do lamine' o-ledelesa neive li gili mu'musi' igi gizebo nizani' nenako nemu' a'mingu' nene longolizesi izisa minilo. Ido' geni inite' lengita soto' ilingumu' nene monotine hulami a'mine geni nene hongu li mini gihu minilo. Ido' O'mosola li minilizani' nene hulami laakovo' igi minilo.

<sup>13</sup> O'moso'mi evenele linge malite inite' mamu' vise' naavo ma nene hize ele' i-ngidi ma ngimilo. Ido' venenga ve ne'mine ma nimonavo ma nenengele'mize lamine' i-ngidi nasahili' i-ngidilo.

<sup>14</sup> Lengi' goboni mili-lingidilizavemu' nene O'moso'mo no'noho' ize-ngedelive li ezela lilo. Ee, usi' ize-ngedelive lamisa asi no'noho' ize-ngedelingumu' nene eita lilo.

<sup>15</sup> Ido' ve ma ingine inite' mamu' ngolize izi nizavo ma nene linginesi a'mingu' mini makato'

longolize izi minilo. Ido' ve ma ingine inite'  
mamu' mulumo alumo gili nizavo ma nene lingi-  
nesi a'mingu' mini mili makato' mulumo alumo  
gili minilo.

<sup>16</sup> Lingine lengi' hamo hamokumu' nene di dizi  
limi gilami asi hamo' monovolo' nene di milisa  
minilo. Ee, lengi' okodine nene di dizami asi  
evene' limi minavesi nene bizi monilo. Ido' la'mo  
nene otohato ve none li okodine di dizamilo.

<sup>17</sup> Evene' malite di goloso i-lingidikevo ma nene  
a'mido' di tine' mili di goloso i-ngidamilo. Asi  
evene' mukiliti ve'nido' nene monovo lamine'  
ogave li ningilizani' monovovo' nene igi mili  
minilo.

<sup>18</sup> Lingine evene' ato ato' mukikisi lovo lolize  
ami hongu li laminivo' minilizani' aka ma neivo  
ma nene a'mine akalokovo' nene e'meti minilo.  
Lengitati' neve nene lovo lolize di soto' amilo.

<sup>19</sup> Lu'ne lengeme nouvoni' alevekizo, evene'  
malite lutine di goloso igi lihime nimili-  
lingidavo ma a'mido' golo hizi a'mine'mine  
i-ngidamilo. Asi O'moso'mo izebolo' molavo  
lihime ngemelize. Ningi mati ngimikilo. A'mine  
nemu' mono' godolou' ti' li gizi nizani' ma neive:  
Guvelesi ve'mo ti' lo line' ve:

Lihime ngemaa' gono nene nenii' gono nenako  
lihime nene nenii' ngemelesuve.

<sup>20</sup> Mo ne'mine igi langisetine nene lihime ngi-  
mamilisaha mono' godolou' ti' li gizi nizado'  
nene e'metilisave:

Lengi' biluva' i-lingidaa' nave ingine ga'na hili  
nizavo ma nene  
di ve'ine milalo.

Ido' nosomu' ga'na hili nizavo ma nene noso ngimilo.

Lingine ne'mine i-ngidilizani' ne'mo nene ngovozo naba goloso nene engita dizavo olo' vele nene godo'nido' mili-ngidani' gelele-seive.

<sup>21</sup> Ido' goloso monovo ne'mo nene lingivile' ogalize. Asi monovo lamine' igi mili minilizani' ne'mo nene monovo goloso nene ivile' igi di limidi minilo.

## 13

*nGamani Alevete Li Hukilizani' Gamazilo' Nesi  
Nene Ha Gelekele' Olone' O Neive Lo Paulo' Line'  
Gamazi*

<sup>1</sup> Ido' evene' ma ngamani gono velelo' nizani' nene O'moso'mo lamivosa nene hamokisi ma nizavoba asi ei' O'moso'mo ngele'mize molavosavo' nene nizanako nemu' nene evene' muki' lingine ngamani alevete lado' nene e'meti gelekele' i-ngidilo.

<sup>2</sup> Ido' O'moso'mo ngele'mize molani' nenako nemu' nene engi' gamazilo' ma peleseve' izilizani' nene O'moso'mo lido' soto' aveti gamazilo' nene peleseve' izilizani' nenako mo angise'ine ne'mine ilizadi'mo nene lihime dalisave.

<sup>3</sup> Ee, ngamani nete evene' ma golise gililiza inite' ngisilizani' nene monovo laminekovo' igi mili minilizave nene golise gililiza inite' ngisilizavoba asi monovo goloso igi mili minilizavevo' nene ne'mine i-ngidilisave. Lingine ngamanimu' golise gelamo minelone' aka've nene do soto' olone li gilisa vise' nahe. Monovo laminekovo' igi

mili minilo. Ne'mine ikevo ngamani nete siza li-lingidilisave.

<sup>4</sup> Ido' siza li-lingidilizani' nene O'moso'mo ngele'mize molavo ei' gelekele' ve miniisa lengi' lengele'mize lamine' ilisa gono nene daa' nani' nenako nemu' nene lingine monovo lamine' igi mili minilizangumu' nene siza li-lingidilisave. Ne neiha monovo goloso ilizani' nene ngamanite lihime lingimilizani' amuzo nene hazamu' di minamani' nenako nemu' nene golise gili minilo. Nene nanitekumu' ve. nGamani nete nene monovo goloso igi mili minilizaveti monovolo' golo hizi lihime ngimilizangumu' nene O'moso'mi gonolo' izipe've nizani' nemu' ve.

<sup>5</sup> Nemu' nene laza ngamani alevete lilizado' e'meto gelekele' o-ngedelone' o neive. Ido' O'mosolo' medeli lihime lingimilizangumukovo' nomive. Asi luteli'mo ngamani gamazilo' peleseve' izaa' ne'mo nene goloso ve lo lo-lemaa' neinako nemukisi nene ngamanilo' gelekele' o-ngedelone' o neive.

<sup>6</sup> Ido' nemukisi nene ngamanila takisi moni huli-ngidilizani' o neive. Ingiue O'moso'mi gonou' izipe've mini a'mine noluvoni' gono nene daa' nave. Nemu' nene gelekele' i-ngidilo.

<sup>7</sup> Evene' muki' hamo hamo' ngimika' ngimika' ilizado' lisihe' o neine' inite' nene mo ha ngimilo. Takisi moni ato atoli'mine evene' ngimilizado' o noline' nene ma ngimilo. Ido' evene' ma dizi minave minikevo ma nemu' nene lengehelele izivo mini di hozi li-ngidilizado' o neivo ma a'mine alevemu' nene lengehelele izivo mini di hozi li-ngidilo.

*Monovo Lamine' Ge O-nede Ne O-gede Lo  
Minelonido' O Neine' Monovomu' Nene Paulo'  
Line' Gamazi*

<sup>8</sup> Ido' linginela golo hizamani' dina' ma neivo ma nene geti golo hizi ngimilo. Evene' hamotasi dina' igisa haza huliki minamilo. Ido' lingine dina' nene di minami golo hizi osukovo' lilizave lo noluvoni'za linginela dina' ne'mine ma minaa' neine' ado' ngeli bekimi amilizani' o minaa' neine' nene ma neive. A'mine dina' nene lingine lutine ge neme ne geme li minilizado' o neine' inite' nemu' nene noluve. Ido' ne'mine noluvoni' nene evene' malite evene' ma lu'ine ngimilizave ingine ne'mine ilizangumu' nene O'moso'mi lou' gamazi'velo' mo e'meti osu' lilizani' nenako nemu' nene noluve.

<sup>9</sup> Ee, O'moso'mo lo huko line' gamazi ado' vene' vemoho' lili' ikeni' nete vene' vemoho' masi gopo ingamilo, ido' evene' ma ngibili hilamilo, ido' gumine amilo, ido' evene' maliti inite'nido' mumuzo' amilo line' gamazisi ido' O'moso'mo lo huko line' gamazi ato ato' muki' nesi nene ado' gamazi ti' lo ma neine' ne'mo nene asabu' izo osu' lo neive. Ado' lingine lengi' okodinemu' gilaa' nani' ne'mini lengi' nizada minilizavemu' nene gili lutine ngimilo.

<sup>10</sup> Lute ngemaa' noolone' nene leli' nonida minilizave nene ngelo do goloso o-ngedamolosunako nemu' laza lute evene' ngemaa' olone' ne'mo nene O'moso'mi lou' gamazi muki' nene mo e'meto osu' gehepeve lolosune.

*Gamene Naba Nene Avito' Oka' Oka' Neine'*

*Nenako Nemu' Nene Laza Monovo Lisihe'  
Laminekovo' Ogo Molo Minelone Lo Paulo' Line'  
Gamazi*

<sup>11</sup> Ne'mine igisa idise gamene'mi monovomu' nene gili minilisave. Ado' api' ogo Kilisito'nimu' gele ele'vole' unidot'i nene O'moso'mo mudise do lu' izeline' gamene nene avito' o'mo ogo mino idise mo avito' organako nemu' nene lingine lutine okise ongo helo miningut'i upuho' igi di otidilizani' o neine' gamene nene mo ogave.

<sup>12</sup> Monovo goloso dizo minine' gamene ado' liti'muso ize minine' gamene nene vo'mo vo'mo vo osu' lolosa neivo go' lo labana' eleline' gamene nene mo avito' ogaze. Nemu' nene liti'musou' minave monovo goloso igi mili minaa' nani' nene lingine vasa izi huli hoto' igi monovo goloso lovo i imiliša lovou' inite' ne'mine O'moso'mi labanaku' minavete igi mili ilizado' lisihe' o neine' monovo lamine' nene di otuhi minilo.

<sup>13</sup> Ee, evene' labanaku' soto' igi monave nete monovo lisihe' laminekovo' igi mili minaa' adi'mine ogo laza nene monovo laminekovo' ogo molo minelone' o neize. Noso ni sipaki igi longolize izamilo. Ee, mo noso ni sipaki amilo. Ido' vene' vemoho' alu gipe lingine gopo ingamilo. Ido' longovozo hilami monovo goloso galasa gopo iga' monovo nene mo amilo. Inite' mamu' lavodine lemavo evene' mamu' nene gili goloso amilo.

<sup>14</sup> Ne'mine monovo goloso nene ogalone li lepesetine ne'mine Guvelesi ve Izusu' Kilisito'ni nene di kisi mini lengemeni dameni liteheli'mo lanite' gelaa' neine' monovo goloso dalizangumu' aka vise' iga' nani' nene mudise hulilo.

# 14

*Lengi' Zuhu Malite Monokumu' Ga'ine Ato'  
Gilangumu' Nene Engi' Monovo'nido'Ize'Mili Lisa  
Gili Goloso Amilo Lo Paulo' Line' Gamazi*

<sup>1</sup> Ido' monoku' gilizevo igi minave ma lengita ikevo ma nene ha ngele'mizi milalo. Ido' ngele'mizi milalizani' nene ingine lingine gatine gilado' vo lisihe' amiline' ga'ine gili nilizangumu' nene lesisi igi gamazidunu' ge hulo ne hulo lisamu' nene ngele'mizi milamilo.

<sup>2</sup> Nene ado' ne'minemu' noluve. Evene' malite gilavo inite' ato ato' muki' naa' nene ha neive. Ne neiha evene' linge ma monoku' gilizevo igi mini ize malise igi mingu' initekovo' naa' nave.

<sup>3</sup> Noso' nite' ato ato' muki' naa' nave nete noso' nite' ma malise iga' navemu' nene gilavo haza nite' ve li gilikelizave. Ido' O'moso ne'mo nene noso' nite' muki' gopo naa' avesi nene mo ei' ve lo ngele'mize molani' nenako nemu' nene noso' nite' malise iga' ave nete noso' nite' muki' gopo naa' aveti monovomu' nene ize' mili lamilizado' o neive.

<sup>4</sup> Lingine gilavo evene' ato' ne'mi gelekele' izipe'veti monovomu' ize' molo laa' nene lisihe' o neivosa nahe. O'ove. Ne'mino nomive. Engi' monovo'inemu' lalive nene engi' me'nibo'movo' nene ize' molo loloseive. Ido' me'nibo O'moso'mo gelavo monovo'ine lamine' neinako ha oti minilisave lilihe ido' monovo'ine goloso neinako di'mozilisave lilihe nene mo eitokovo' neive. Ido' ei' O'moso'mo do ote-ngedelido' lisihe' o neinako ingine mo oti minilisave.

<sup>5</sup> Ido' gamene hamo hamokumu' gilune' nene evene' linge ma nete gilavo gamene nene dizi limi minaa' naha evene' linge ma nete gilavo gamene muki' nene dizi limi minami mo hamoli'minevo' minaa' nave. Lingine evene' malite gilangumu' ize' mili lami hamo hamo' a'mine gamenemu' gilavo lisihe' iline' akamu' nene gili ele'vole' igi a'mido' e'meti minilo.

<sup>6</sup> Evene' ma ingine gamene mamu' nene gamene naba ve li gilaa' nani' nene Guvelesi vemu' gili ne'mine iga' nave. Ido' evene' ma noso' nite' ato ato' muki' naa' nani' nene a'mine noso' nitekumu' nene O'moso tangezo' ve li opo'ni li-daa' nani' nenako neve nene mo Guvelesi vemu' gili minisa naa' nave. Ido' evene' ma ingine noso' nite' ma malise iga' nave ingine Guvelesi vemu' gili malise igi inginesi O'moso tangezo' ve li opo'ni li-daa' nave.

<sup>7-8</sup> Ido' ne'mine noluvoni' nene nemu' noluve: Laza minevo' alevo' olone' nene Guvelesi vemu' minevo' alevo' olosune. Ido' hele lone' nesi nene Guvelesi vemu' helelesune. Nem'u' nene laza minevo' alevo' olone' nene evene' hamolitesi lelikumukovo' nene ma minevo' alevo' osa'mune. Ido' hele lone' nene hamolitesi lelikumukovo' nene ma helesa'mune. Nem'u' nene minevo' alevo' ogo minelobe ido' helelobe nene Guvelesi ve'mi evenelevo' nene minelesune.

<sup>9</sup> Nem'u' nene Kilisito' aza evene' ve'nesi ha nizaveti Guve'nesi ve mino hili nizaveti Guve'nesi ve nesi nene minelongumu' ve losa hiline' ve. Ido' nemukisi nene oto minevo' minevo' ogo neive.

<sup>10</sup> Ido' laza mukito' O'moso'mo goni' o-ledelido' eze velelo' vo otekunivo mukito' nene ei' ize'

molo-ledeline' o neinako lingine linge ma lengi' zuholiti monovo'inemu' ize' mili laa' nani' nene nanimu' nave. Ido' linge ma nete lengi' zuho mamu' gilavo lemo hazza nite' lolo' ogal' neine' nene nanimu' nave.

<sup>11</sup> Ido' O'moso'mo goni' o-ledelido' nene ha volosune noluvoni' nene mono' godolou' gamazi ma ti' li gizi nizani' neine' nenako nemu' nene noluve:

Guvelesi ve'mo ti' lo nolive:  
Naza nouvonu' nene soza nomive. Mo gamazi  
gihile lamineto' neive.

Ido' a'mine'mine ogo  
naza evene' hamo hamo' muki' lingine obuvotine  
hizi neni' gubi' izi nimi

Gaza O'moso gihile nane li li soto' ilisave lo  
noluvoni' nene  
gamazi gihile laminekovo' noluve.

<sup>12</sup> Nemu' nene laza evene' hamo hamo' muki' leli'  
ogo molo minune' monovote nene lo soto' ogo lo-  
emelesune.

*Leli' Ogo Molo None' Initeto' E'meti Leze Zuho  
Malite Goloso Ve Li Gilani' Init'e Disa Lihime Dike-  
lizave. Leli' Monovotelo' Gizebo Lamine' Olosune  
Lo Paulo' Line' Gamazi*

<sup>13</sup> Nemu' nene laza ge ize' molo-nede ne ize'  
molo-gede lo minaa' monovo nene hulo gohi  
amolone. Asi lingine ti' li gili minilo. Leze  
zuho ma nene limi ingikelizaze. Laza ngele'mize  
goloso ogal' monovo nene amolone.

<sup>14</sup> Naza Guvetesi ve Izesuda gi'mize nouvonako  
ne'mo nene ti' lo gele ele'vole' gehepeve o nouve:  
Noso' nite' leli' lute do goloso o-ledaa' emeni  
damenisi minine' noso' nite' ma nomive. Ne

neiha evene' malite inite' mamu' nene lute do goloso oga' inite' ve li gililizani' nene a'mine inite' neve nene engi' lu'ine do goloso oga' inite' lolo' oloseive.

<sup>15</sup> Ne neiha lingine lengi' zuho malite noso' nite' mamu' nene lute do goloso oga' inite' ve li gili nizani' noso' nite' ma gopo naa' ilizadi'mo nene a'mine lingine zuho di goloso i-ngidilizani' nene mo lutine ngemaa' monovolo' e'metami minilisanako nemu' nene lingine ne'mine ogo leze zuho ngele'mize goloso oga' monovo ma amolone li gili minisa noso' nite' nalizadot'i nene Kilisito' engito' hilive nene vi tolovo ilizani' akalo' ngele'mizi milamilo.

<sup>16-17</sup> Noso' nite' ma nalobe ido' malise ogo minelobe ne'mo nene O'moso'mo gizebo o neine' akau' nene inite' naba nomive. Asi O'moso'mi Sikalahu' ne'mo nene do soto' o-ledaal' monovo ado' monovo lisihelaminekovo' ogo molo minaa' nesi ido' muludeu' hongu lo lamino minaa' nesi ido' luteu' gulumo avile lisivo minaa' monovo nesi nene inite' naba neine' nenako nemu' nene lingine monovo lamine' nehe li noso' nite' ha gopo nikevo lengemenga likelizaze. Alamilo.

<sup>18</sup> Ne'mine igi Kilisitoda gelekele' i-di minilizave ingine nene O'moso'mo mulunou' lamine' geleline' inite' igi mili mini evene' nesi ningavo lisihelamine' iline' monovolo' nene e'meti minilisave.

<sup>19</sup> Nemu' nene lingine lengiku' hongu li bizi lamini miniliza monovolokisi ido' monoku' ne hize ele' o-gede ge hize ele' o-nede li minilizado' lisihelamine' o neine' monovo ato atokisi nene amuzo

mili e'meti minilo.

<sup>20</sup> Noso' nite' ha gopo nalizani' ne'mo nene lingine O'moso'mi gono di goloso amilo. Noso' nite' ato ato' muki' nene lute do goloso amaa' neiha ha gopo nokunivo ne'mo nene evene' linge ma monokuti' limi ingalizani' nene monovo goloso olosune.

<sup>21</sup> Nem'u' nene ize me'mele nehe vaini noso nehe inite' ma nehe nene lingine nalizadi'mo lengi' zuho linge ma mono' akaloti' nene vi zovo' izilizani' nene lingine a'ne'mine inite' malise ilizani' nene lamine' o neive.

<sup>22</sup> Ido' a'ne'mine initekumu' nene lingine hamo hamo' gilani' nene lengikisi O'mosolokisivo' neivo lengi' hamo hamokovo' gili minilo. Evene' ma nete monovo mamu' nene ne'mine og'a' ha neive li gilangumu' nene engi' lu'ine'mo goloso ve lo goni' o-ngedamiline' nene engi' minevo' alevo'ine lamine' neivo ngolize izilizado' lisihe' o neive.

<sup>23</sup> Evene' ma inite' mamu' nene nalone' lute do goloso ilihe li ga'ine seta' gili minisasi a'mine inite' gopo nalizani' nene mo O'moso'mo lihime molo-ngedelesive. Nene nanitekumu' ve. Laza inite' mamu' nene monovo lisihe' ve lo gele ele'vole' amosasi ha gopo olone' nene monovo goloso une' gelavo lihime dalone' nenako ido' ingine a'mine inite' naa' nene lisihe' o neive li gili ele'vole' amisa nalizani' o neinako nemu' nene O'moso'mo lihime molo-ngedelesive.

## 15

*Laza Leli' Lutelokovo' Ogo Molo Minamo*

*Kilisito' Ogo Molo Minidi'mine Ogo Leze Zuh  
Monoku' Gilizevo I Minani' Nene Hize Ele' O-  
ngedelone Lo Paulo' Line' Gamazi*

<sup>1</sup> Laza monoku' amuzo molo nonive nene leli' lutelokovo' ogo molo minamo monoku' gilizevo i nizave hize ele' o-ngedo engi' geni ngibiline' inite' nene lazasi gehe-ngedelonido' o neive.

<sup>2</sup> Laza hamo hamo' muki' nene leze zuho monoku' do amuzo molo-ngedelingumu' ve lo do lamine' o-ngedelesa nene ingine gilavo lamine' iline' initekovo' ogo molo minuke'zo.

<sup>3</sup> Nene nanitekumu' ve. Laza nene Kilisito' idi'mine ogo ogo molo minelone' o neinako nemu' ve. Kilisito' aza nesi ei' lulolokovo' ogo molo amine'za mono' godolou' ti' li gizi nizani' nene eito' gihile izine' ve:

O'mosoo, gei' divi ledivi' i-gidaa' avete  
divi ledivi' i-gidi lani' ne'mi geni've nene nen'i' nogihuve.

<sup>4</sup> Ido' naza mono' godolou' gizi nizani' gamazimu' noluvoni' nene nemu' noluve: Gozopo' gizi nizani' gamazi muki' nene O'moso'mo a'mine gamazi leli' nene mono' apize lemelize lo gelo lavo gizi nizani' ve. Ee, monoku' amuzo mili mini geni ha gihi di dici minilizado' nene a'mine gamazi ne'mo lu'ine do ngi lo-ngedavo ga'ine sita' gilami lukuvo nalizangumu' nene gilingili igi gizebo igi minilizave lo gelo O'moso'mo lavosa a'mine gamazi nene gizi nizani' ve.

<sup>5-6</sup> Ido' lingine lutine gatinesi ido' gamazitinesi nene di hamo' igisa Guvetesi ve Izesu' Kilisito' melehine O'moso nene opo'ni li di naba i-dilizave

lo monoku' amuzo molo geni gehe do dizo minaa' monovo ido' lute do ngi laa' monovo do soto' ive O'moso ne'mo nene lingine Izesu' Kilisito'ni e'meti nizavo gatine gilaa' nani' nene do hamoli'mine o-lengedeliho.

*Kilisito' Aza Zuda Vesi Ido' Heta Ato' Vesi  
Lele'mize Lamine' Ine' Nenako Laza A'mine'mine  
Ogo Ge Nele'mize Lamine' O-nede Ne Gele'mize  
Lamine' O-gede Lo Minelone Lo Paulo' Line'  
Gamazi*

<sup>7</sup> Nemu' nene O'moso opo'ni li di naba i-dilizangisi Kilisito' aza lengikisi lengele'mize lamine' idi'mine igi lingine ge nele'mize lamine' o-nede ne gele'mize lamine' o-gede li minilo.

<sup>8</sup> Ido' Kilisito' lengi' evene' ato ato' lengele'mize lamine' ine' gamazi noluvoni' nene nemu' noluve: Kilisito' aza O'moso'mo gamazi laminetokovo' laa' neine' nene do soto' ogo O'moso'mo Zuda veti avotemotinemu' lo huko lo-ngidine' gamazi nene do gihile izelesa gelekele' ve loloi' ogo O'moso'mi noso okodela mulunive Zuda ve lelita nene gono dani' ve.

<sup>9</sup> Ido' Zuda ve lelikumukovo' ani' nevoba asi O'moso'mo heta ato' vesi ise'ine izavo inginesi a'minemu' opo'ni li di naba i-dilizangumu' ve losa nene engikumukisi ani' ve. Ido' ne'mine ine' nene mono' godolou' ti' li gizi nizado' nene e'metosa ne'mine ine' ve:

Nemu' nene O'mosoo, heta ato' veti vovo'ningu' mino gopo'ni lolosuve.

Ee, gei' guliveka do hozi lo nama lolosuve.

<sup>10</sup> Ido' ma nene ti' li gizi nizani' ve:

Heta ato' ve lingine O'moso'mi evenelesi makato'  
longolize izi minilo.

**11** Ido' gohi ma ti' lo neive:

Heta ato' ve lingine muki' nene O'moso opo'ni li  
minilo.

Ee, evene' zuho ato ato' muki' ingine nene  
O'moso opo'ni li minilizani' o neive.

**12** Ido' polohete Isaia' nesi nene ti' lo ma line' ve:  
Guvelesi ve Davidi' meleho Zesai' a'vopilemo'  
zuhouti' nene

ve ma soto' oloseive.

Aza nene heta ato' veti guve'inesi ve lolo' ogo  
gizebo o-ngedo neivo

heta ato' ve ingine gilingili igi ezemu' gili ele'vole'  
ilisave.

**13** Ido' lukuvo naloningumu' nene gele mu'musi'  
oga' monovo do soto' ive O'mosomu' nene gili  
ele'vole' igi nizavo aza lavo muludingu' nene  
gulumo avile atoli'mine ogo lisivo hongu gehep-  
eve lo neivo O'moso'mi Sikalahu' ne'mo lukuvo  
nalizangumu' nene gili mu'musi' ilizani' amuzo  
nene lengemavo ne'mo vauve ilisa gili mu'musi'  
igi minavoo.

*Luhuvo Nite' Mene Nogize-lingimuvoni'  
Nene O'moso'mo Nimine' Gono Nodosa Nogize-  
lingimuve Lo Paulo' Ei' Gono Dani' Monovo Line'*

**14** Neze zuhokizo, nen'i lengikumu' giluvoni'  
nene mo ne'mine losa gele ele'vole' ogo gele  
nouve: Ado' lengita nene monovo lamine' vai' lo  
neivo gamazi monovo ato ato' muki' nene mo gili  
minisa lingine ne gaka doo do akalo' o-gede ge  
ga'ne doo do akalo' o-nede li minilizado' lisihe' i  
nizave losa gele nouve.

**15** Ne'mine lo gele nouha eze O'moso'mo nen'i' ninge lamine' do heta ato' ve lengita gono nimine' nenako nemu' nene mono' linge ma gohi do gatido' molalove lo luhuovo nite' mene nogizuve. Ido' gamazi linge ma nogizuvoni' nene amuzo malehe gamazi nogizuvoni'za neemukisi nehelele izamivo ha nogizuve.

**16** Ee, O'moso'mo Izesu' Kilisito'ni gelekele' ve've loloi' ogo heta ato' vemu' nene gono daline lo nele'mize molavo naza eveneto' medelo mino O'moso inite' lehize-daa' uve gelo O'moso'mi Sikalahuli'mo do kekeize lo-ngedavo O'moso'mo ninge lamine' ilido' i nizavo naza heta ato' ve nene O'moso'mine lehize-delove lo O'moso'mi gamazi lamine' nene heta ato' vesi lo soto soto' ogo lo-lengemaa' nouve.

**17** Nem'u' nene naza giluovo Izesu' Kilisitoda gi'mize mino O'mosomu' gono daa' nouvoni' nene dizo minavo naza a'minem'u' nolize izo mino laa' nouve.

**18-19** Ido' inite' mamu' lolovoba asi O'moso'mi Sikalahuli'mo amuzo nemavo na'nise'ne gamazi noluvosi ido' ngehelele izeline' inite' oso' amoso' suno ato ato' ngelebizo ogo molo nouvosi Kilisito' aza heta ato' ve do eito' gelekele' o-ngeedelesa ine' initekumukovo' nene lovo' kiselevo' ogo lolosuve. Ido' noluvoni' ne'mine ogo Zelusalemi numuno ebetoti' api' ogo Kilisito' gamazi've lamine' nene lo soto soto' o'mo vo mo Ililikumi misubola vo pelekuve.

**20** Ido' ne'mine noogo naza evene' mali'mo gono dado' imine' molo damo Kilisito' gulive've olihe gilamadaavo' nene ezemu' gamazi lamine' lo soto' ogo lo-ngemelove losa nen'i' lu'ne'mo

gilido' nene e'metuvoni' ve.

<sup>21</sup> Ne'mine novo mono' godolou' ti' li gizikani'  
gamazi nene vo gihile izine' ve:  
Ezemu' gamazi gilamave ingine nene ningilisave.  
Ee, eze gamazi gilamave a'minemu' gili guno  
ilisave.

*Loma Ebeku' Vo Ninge-ngedelesa Gilingumu'  
Paulo' Lo-ngemo Line' Gamazi*

<sup>22</sup> Ne'mine ogo gono do mineloni' neidi'mo  
naza lengita aloса giluvoni' aka'ne nene hize tile-  
nidine' ve.

<sup>23</sup> Ne neiha idise mene noluvoni' misubola  
nene gono daloni' ebe' gohi ma nomivo naza  
kilisimasi mukiku' lengita volove lo amuzo molo  
giluvodo' e'meto lengita alosuve.

<sup>24</sup> Ido' alosuve noluvoni' nene Sipeni misubou'  
volosa aka novosa lingine ninge-lengedelesa len-  
gita vo hetelo lengikisi nene gamene linge ma  
minekuvo a'mida voloni' aka'ne nene vili-nidi  
hize ele' i-nidikevo volosuve lo gele nouvoni'  
nemu' noluve.

<sup>25</sup> Ne neiha idise naza O'moso'mi evenele  
zuho Zelusalemi ebeku' nizani' nene hize ele' o-  
ngedelesa a'mida novuve.

<sup>26</sup> Ido' novuvoni' nene Izesu' evenele Make-  
donia misuboukisi Akaia misuboukisi Izesu'  
evenele Zelusalemi ebeku' minanguti' goho' ga-  
hali' alevemu' nene moni do nubuho ogo ngemel-  
one lisa di nubuho ani' nemu' nene novuve.

<sup>27</sup> Ee, angise'nidati' ne'mine olone li ani'za  
lute do lamine' oga' inite' Zuda velati' soto' ine'  
nene heta ato' ve lengita ma inele ani' nenako  
nemu' nene a'mido' golo hizi okode do lamine'  
oga' inite' lengita neine' nene Zuda vela inele ma

ilizani' o neido' nizanako a'mine ani' inite' nene engita dina' ne'mine minine' nene apaselido' o minine' ve.

<sup>28</sup> Ido' a'mine gono do oku' lo ingine mono' gihile di soto' igi moni di nubuho ani' mene dalizaveti a'ningu' gehepeve molosa Zelusalemi numuno ebe' hulo lengita ogosa Sipeni misubola volosuve.

<sup>29</sup> Ido' naza lengita voloni' nene Kilisitodati' no'noho' vauve elo do-lengedo alosuve lo gele nouve.

<sup>30</sup> Neze zuhokizo, naza amuzo molo ti' lo longo' noo-lingiduve: Lingine Guvetesi ve Izesu' Kilisito'nimu' ve li ido' O'moso'mi Sikalahuli'mo lute ne geme ge neme lo minaa' monovo do soto' o-ledaa' neingumu' ve li naza amuzo molo O'mosola laa' nouvodi'mine igi linginesi imine' mili nenikumu' nene amuzo mili O'mosola li'mi vi minilo.

<sup>31</sup> Ido' O'mosola lilizani' nene naza Zudaia misubouko volongu' nene a'mida Kilisito'nimu' gili ele'vole' amavelite nibililisa gili nilizangutu' nene lukuvo nalongumu' ve li ido' Izesu' evenele zuho Zelusalemi numungu' nizani' ingine do vo ngemelonu' initekumu' o'ove lami lu'ine lamine-toti' dalizave li O'mosola lilo.

<sup>32</sup> Ido' ne'mine likevo O'moso'mo gele lenge-mavo ne'mo nene naza lu'neu' gulumo avile lisivo O'moso'mi lulolo' noline' nene lengita ogo hetelo lengikisi mino hepe' doo lamine' gele-longumu' nene O'mosola lilo.

<sup>33</sup> Hongu lo lamino minaa' monovo lemaa' ive O'moso nene lengi' mukita minivoo. Mo ne'mino miniliho.

# 16

*Paulo' Even'e' Muk'i' nGopo'ni Line' Gamazi*

<sup>1</sup> Alungo ma gulive Hoibe' lengita naani' nene nasahili' i-dilizave lo eze monovo've ti' lo nolo-lingimuve: Aza nene Izesu' evenele Kenekelaebeku' mulise milaa' nada mono' gono daa' ine' alu nene neive.

<sup>2</sup> Nemu' nene Izesu' evenele zuho ilizado' lisih'e' o neine' monovolo' nene e'meti Guvelesi vemu' ve li ele'mize lamine' ilizave lo noluve. Ido' aza nene evene' vaikisi nenikisi hize ele' o-ledaa' ine' nenako nemu' nene initel' ne'mine mana'minemu' vise' iline' nene lingine hize ele' i-dilo.

<sup>3</sup> Ido' nezesi makato' Izesu' Kilisito' gono daa' une' aleve Pilisikangi ido' vanaho Akuilangi nene ngopo'ni noluze. Li-ngimilo.

<sup>4</sup> Ingine nene ngibili hilaa' akalo' vi neni' lukuvo nimasine' ve. Nemu' nene naza engikumu' isetine ve lo mulu'neu' lamine' gelaa' nouve. Ido' nenikovo' nevoba asi Izesu' evenele zuholiti mulise muki' heta ato' vetingu' mini'mi monani' inginesi nene a'minemu' mulu'ningu' lamine' gilaa' nave.

<sup>5</sup> Ido' engi' numu'ningu' mulise milaa' navesi nene ngopo'ni noluze. Li-ngimilo. Ido' Asia misubou' aleveuti' gana' Kilisitoda vo gi'mizive lu'ne eme nouve Epaineto'ni nesi nene opo'ni noluze. Li-imilo.

<sup>6</sup> Ido' lengito' gono amuzo molo daa' ine' alu Malia'ni nesi nene opo'ni noluze. Li-imilo.

<sup>7</sup> Ido' neni' ne'mini Zuda ve minasive nenikisi makato' galapusolo' minunive Adilonikongi Zuniangi nene ngopo'ni noluze. Li-ngimilo.

Aposololiti muliseu' nene engi' gulive'ine dize minine' ve. Ido' ingine nene gomu' mili nimi Kilisitoda vi gi'mizi minasine' ve.

<sup>8</sup> Ido' Guvelesi vela gi'mizusive lu'ne eme nouve Abiliato'nisi nene opo'ni noluze. Li-imilo.

<sup>9</sup> Ido' maka' Kilisitoda gono daa' unive Ulubano'nisi ido' lu'ne eme nouve Sitaki'ni nesi nene ngopo'ni noluze. Li-ngimilo.

<sup>10</sup> Ido' Kilisito'nimu' gele ele'vole' ogal' ive gehepeve Apele'ni nesi opo'ni noluze. Li-imilo. Ido' Alisitobulo' zuho nesi nene ngopo'ni noluze. Li-ngimilo.

<sup>11</sup> Ido' nenil' ne'mine Zuda ve minive Helidia'nisi nene opo'ni noluze. Li-imilo. Ido' Nalakiso' zuho nesi nene Guyetesi ve'mi zuho nizanako engikisi nene ngopo'ni noluze. Li-ngimilo.

<sup>12</sup> Ido' Guvelesi ve'mi gono amuzo mili daa' asive Tilihainangi Tilihosangi nesi nene ngopo'ni noluze. Li-ngimilo. Ido' Guvelesi ve'mi gono vai' amuzo molo daa' ine' alu Pelesi'ni nesi nene opo'ni noluze. Li-imilo.

<sup>13</sup> Ido' Guvelesi ve'mi evenele lamine' gehepeve minive Luhu'ni nesi opo'ni lo ei' izeleho nenil' ize'neho gelo minine' nesi nene opo'ni noluze. Li-ngimilo.

<sup>14</sup> Ido' Asungilito' ve Helegoni' ve Helemesi' ve Patalobasi' ve Helemasi' ve ido' leze zuho engikisi makato' minave nene ngopo'ni noluze. Li-ngimilo.

<sup>15</sup> Ido' Hilologo' ve Zulia' ve ido' Neleakisi alunolosi ido' Oliba' ve ido' Kilisito' evenele linge ma engikisi nizani' nesi nene ngopo'ni noluze. Li-ngimilo.

**16** Lingine nene O'moso'mi eveneleelite ilizado' o minine' monovolo' nene igi adingu' di ge nabuti' ize ne gabuti' ize li minaa' ilo. Ido' Kilisito' eveneleliti mulise mevola mini'mi monadite nene muki' longopo'ni nilave.

*Evene' Ma Mono' Di Gopo Igi Li Izesu' Evenele Hizi Ho'li-ngidilizavemu' Gizebo Lamine' Igi Engikumu' Olovo' Igi Minilo Lo Paulo' Line' Gamazi*

**17** Neze zuhokizo, gatine do naza amuzo molo ti' lo nolo-lingimuve: Ehetine' neve. Lingine mono' ganakuti' gilado' vo damine' gamazi li-lingimi monokuti' limi ingaliza initekisi ido' hizi ho'lilizani' gamazisi lilizavemu' nene gizebo igi olovo' igi minilo.

**18** Nene nanitekumu' ve. A'ne'mine ve ingine nene Guvetesi ve Kilisito'nimu' gelekele' iga' navoba asi engi' oko'nine ne'mo lanite' giline' initetokovo' nene gelekele' iga' nave. Gamazi lanite' ine' gamazi soza saza gamazi lisa ingine golosumu' gilamaveti lu'ine nene golo izi ngele'mize gopo iga' nave.

**19** Ee, lingine gamazi lamineto' gelekele' iga' nangumu' guvetine nene mo misubou' misubou' buu lo monine' nenako nemu' nene naza lengikumu' nolize izaa' nouve. Ne neiha lingine monovo laminekumu' nene gili nge li minikevo monovo goloso nene lengito' vo gi'mize minamilive lo gele nouve.

**20** Ne'mine ikevo hongu lo lamino minaa' monovo do soto' oga' ive O'moso ne'mo nene mine ha'na amo hize ele' o-lengedo neivo Satanisi

ei' zuhosи ngivile' gehepeve igi lingine lisi hupi'  
izi-ngidani' geleleseive.

Guvetesi ve Izesu' nasahili've nene lengita  
minivoo.

<sup>21</sup> Nezesi maka' gono daa' usive Timoteo' nene  
longopo'ni nolive. Ido' nen'i ne'mini Zuda ve  
minave Lukiole Zasonile Sosipatelole ingine nesi  
nene longopo'ni nilave.

<sup>22</sup> Ido' Paulo' gamazi nolivo luhuvo nite'  
mene gizuve Teletio' nazasi nene Guvelesi ve'mi  
evenele nouvonako longopo'ni noluve.

<sup>23-24</sup> Ido' Paulo' naza numu'veu' ongaa' uve  
Gaio' ei' nesi nene longopo'ni nolive. Eze  
numu'veu' nene Kilisito' evenele muki' nesi nene  
mulise milaa' nave.

Ido' mene numuno ebeku' ngamani monilo'  
gizebo oga' ive Elasito' ve ido' leze zuho Kualato'  
ve engi' nesi nene longopo'ni nilasive.

### *Paulo' Gamazi've Lo Osu' Lo O'moso Opo'ni Lo Line' Gamazi*

<sup>25-26</sup> Naza mono' gamazi lamine' lo soto soto'  
nouvoni' ne'mo nene O'moso'mo monoku' do  
ngi lo-lengedelido' o neive lo neine' ve. A'mine  
gamazi nene Izesu' Kilisito'nimu' gamazi lamine'  
nene neive. Gamene gala'mudati' vomine a'mine  
suno' gamazi haleke minine' nene vo'mo vo'mo  
ogo idise mene soto' nopizive. Ee, heta ato' ve  
muki' a'mine gamazimu' nene gili gili ele'vole'  
igi a'mido' gelekele' igi e'metilizave lo idise nene  
minevo' minevo' O'moso ne'mo lavo polohetelite  
gizikani' gamazi nene lo-ngemo a'mine gamazi  
nene heta ato' ve mukita nene lo soto' nounivo  
a'mine gamazi nene soto' nopizive.

**27** O'moso ei' hamo' nene otohato ve ne neive.  
Ne'mine o neize. Laza nene do hozi lo-do Izesu'  
Kilisito'nimu' ve lo opo'ni lo minevo' minevo'  
ogo minelone' nene oku' lamivoo. Ne'mine ogo  
miniliho.

**MONO' GODOLO GOSOHO'  
The New Testament in the Dano (Upper Asaro)  
language of Papua New Guinea  
Nupela Testamen long tokples Dano (Upper Asaro)  
long Niugini**

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 18 Apr 2025 from source files dated 31 Aug 2023

76c78bc1-63e6-5f61-a363-169051cf72e